

PAULINE EPISTLE

Paul lekhatot ho

Paominlen Kipgen (PK) M.Th

PAUL HINKHO

Paul hi (tua Turkey) gamma um Tarsus kho'a peng ahi. Benjamin phung mi, Pharisee chapa, ama tah jong Pharisee ahi. Scholar tampi gel danin Paul hin akhangdon laiija Greek philoshphies leh religious culture (houlam chondan) tampi anahetsa hidingin agingchaove. Ama hi Cilicia (tua Turkey) gamma um Tarsus kho'a peng, Jerusalem'a hung khanglen, houhil Gamaliel khophang bula jilna hinnei doh ahi.

Tarsus'a peng Tarsus mi ahito lhonin Paul hin Greek pao themtah'in atho theije. Ajeh chu chulaija chu Greek pao hi mun tina ana kimanga, Greek institution jong muntina ana kihong doh ahi. Hichung chonna Paul hin Rome mi hina (Roman citizenship) jong aneijin ahi(Acts. 22:25-28). Rome gammi hina hi mijouse changtheilou, mibol thei tamtah jong changjoulou ahi. Chukitle Rome mihina nei khatchun phatchomna tampi jong aneijin ahi.

1. Roman citizen bou chu Roman citizenship nei mitoh kicheng thei ahi.
2. Ajeh lhingset leh kholchil na lhingset kija louva Roman citizen khat chu kijep ngailou chule songkul'a kikoi theilou ahi.
3. Court neova patna Emperor (lengpa) koma achung thu tan dinga appeal abolthei ahi.
4. Roman citizen khat chu gotna khautah, tichu cross'a kilbehna ho'a kona ongthol thei ahi.

Rome gammi hina hi koima pou changtheilou ahito lhona chan theina lampiho chu:

1. Rome'a peng Rome mi mongmong ho chu changthei ahi.
2. Military service'a kona jong chan thei ahi.
3. Kum som'a patna achunglam veteran (adeh'a sepai) ana hiho bou changthei ahi.
4. Alhangpi'a mu naleh mi tampi'in anamu na chu: Soh'a konna chamihat (free from slavery)'a kon ahi.

Chutobang chun chulai khanga dinga mijousen ana kiletsahpi Rome mi hina chu Paul'in jong ananeijin, hichun a ministry jenga jong amachal sah lseh jengin ahi.

Insung lampanga seidin, solchah lekhabu'a ahin chuleh Paul amatah jeng in jong atam seipoi. 3rd century lekha jih minthang Jerome'in ana sutdanin Paul hi a'insung mite toh Judea gamma Gischal'a konna Tarsus'a hungpem lut ahi atin, ahin hijeng jongchu adih louna point ni aumme.

1. Gishchal chu Juda gamma umhilouvin Galille gam joh'a um ahi
2. Paul amatah'in Tarsus'a peng kahi ati (Acts. 22:3). Hichu ahile Paul'insung mite hi Jews Diaspora (Judami Palestine gam polama cheng) ahiuve.

Paul hi Roman Citizenship neimi ahigoh hilouvin, Hebrew mi dihtah ahi photchet ahi. Alekha thot sunga tampi vei Paul'in Hebrew mi ahina thu aseiyee (Phil. 3:4-6; Gal. 1:13,17; I Cor. 15:8-10; 2 Cor.11:22; Rom. 11:1). Paul'in Hebrew mi dihtah ahi Phil 3:5 na'a ahilchene.

1. Ni get ni'a chep kitan: Cheptan hi apolamma mikhat chu Judami mongmong ahi ti photchetna ahi. Chuleh hiche hin mihemkhat chu Pathen'in akitepna aneipi mite ahinao jong aphotchet ahi (Gen17). Juda mite pasal apeng jouse ni get ni'a chep kitan ahi. Chuche tilouva jong mitampi chu Judami kiso'h'a akiso ni'a chep kitan jong aumuva ahi. Hijeh'a chu Paul'in niget ni'a chep kitan ati hin Juda mi dihtah ahi aphotchetna ahin; akiletsah pi mama jeng ahi.

2. Israel phung mi (2 Cor. 11:22, Rom. 11:1): Paul'in Israel mikhat kahi ati nahi jat ni'a lah thei ahi. Akhatna'a: Tahsa lamma Abraham son leh chilhah ahina; anina'a, Houthu lamma aseina ahi. Juda mi dih tah khat hina ding chun tahsa lam sangin hou lamma aha kingapjoi. Abraham chilhah Judami hochu Abraham Pathen toh akitepna neikhompi hochu ahi. Rom. 2:28,29 na'a Juda mi dahtah chu apolam'a kilang joh hilouvin asung gilla lhagao lama Judami dihtah hina neiho johchu ahi ati.

3. Benjamin phunga kon (Rom. 11:1): Paul'in Benjamin phung mi kahi atilona jeh chu Israelte leng masapen Saul chu Benjamin phunga kon ahin, akiletsah pi mamau ahi. Chuleh Juda leh Israel kikhenin jong Benjamin hi Juda langa ana beh ahi. Chukitleh Paul ojapu Gamaliel, chulaija houhil minthang mama jong chu Benjamin phung mi ahi.

4. Hebrew lah'a jong Hebrew (2 Cor. 11:22): Paul'in Hebrew mi hina aseina hi aHebrew pao thotheina aseina hinte. Ajeh chu chulaija chu Hebrew mi hija Hebrew pao thotheilou ana tam ahi. Jerusalem'a Juda Christian kiloi khom ho jong chu jatni'in aka kiseija, Hebrew pao thotheiho leh Greek pao thoho tia ana kihomkhen ahi.

5. Chondan lamma Pharisee: Phariseeho hi Juda mite lah'a dinga kiloikhomna (sect) lenpen pen khat leh mitampen pen, mitampin jong anasotnu; Danthu hetna lam jenga jong achungnung pen loi, Juda mite lah'a ja um loi anahiuva ahi. Chuho lah'a chu Paul amatah jong member khat anahin apa jong anahi. Amahohi milham hotoh bang louva achombeh leh atumbek'a chonpha deh hon/group, imalam jouse'a aluboh ana hijingu ahi. Jesu Christa phatlai chun amaho hi mi 6000 lang analhing taove.¹

Hitobanga chu solchah Paul hi Rome mi hina dihtah nei, Hebrew mi dahtah, nolnabei, Pathen'in amanchah nung jenga jong ahina chanvou neiho kitup tah'a mangcha thei mi ahi.

¹ **PHARISEE**: Hiche thucheng hi 'parash' a kon kiladoh hichu "kichomkhen/chomkhen (to separate)" tina ahi. Amaho hi houlam thudol'a kiloi khom "holy one" ti'a hung kipan, Maccabeas toh hung kitho uva Palistine gamsunga Greek chondan (hellisnistic) suhmang som ahivu. Ahin Maccabies hochu Hellenism (greek chondan) toh ahung kijopmat phat uva hiche group hohi hung kichom khen doh'uva atum beh'a midang sanga lamdang jep tah le tomngai tah'a Pathen'a dinga hung kichom khen doh ahivu. Amaho hi lhomcha ahivangun Palistine gam'a mitam jo seiphah ahivu. Jesu khanglai chu Josephus seidanin mi 6000 val ana'umun ahi.

Amaho hin danthu ho khaotah'in asemun, ajui buki gouvin, achuti nalamun Pathen houding sumil leuvin danthu chu ana ngolpiuvin ahi. Amahon Pathen chu dan thuhu hoitah'a ijuu bukim le alunglhajje ti'a ana tahsan'u ahin, chuche phatlaija dinga chu Themgao dinmuna ana ding ahivu.

Amahohi Pathen khatseh tahsan (monotheistic) ahivuvin, Old Testament apumpin athaneina apomuvin; vantil ho le thilha ho a'um atahsanun; thi nunga hinkho leh thokitna jong atahsanun ahi. Amahon Pathen'in mihem hinkho hi akhohsah'e ti atahsanun, ahin mihem hohin atoh dungjui cheh'uva achunguva thil lhung ji ahi ti jong atahsanui.

Amaho hi Missionary lungputah ahivuvin, ahithe channa Gentile tejong Juda tahsan na'a puilut ding go ho ahivu. Kivaipohna lam (politics) langa lunglutna anei pouvin, ahin akipum kangse theideh pouve.

IMPORTANCE OF PAUL (Paul thupina)

1. Paul hi Christian thusima dinga chungnung pen khatseh atepi ding umlou ahi. Tradition dungjujin Solchah hiding chu “Jesu Baptize chana pat vanna akalgei mu’a leh he’a; Jesu Christa amatah’in akou, Jesu Christa amatah’in kichuhna (training) apéh, Jesu Christa amatah’in asol mi hiding ahi.” Ahin Paul hin Jesu Christa leisetna alenlai anamu louvangin, Jesu Christa kouna anachangin, Jesu Christa amatah’in kichuhna apéh (Gal. 1:11-12, 16-18) , Jesu Christa amatah’in asol ahi.

2. Paul hi Christiane mun neocha, lungthim neocha leh chondan neocha’a patna hin puidoh’a vannoti hou (universal religion) hinsodoh; mijouse leh chondan jouse toh kitoh’a hin podohpa chu ahi. Aman Judaism leh Christianity kikkeh dan ahilin, amatah Judaism’a patna hungpot doh’a Gentilete lah’a hung kiphong ahi.

3. Paul’in Missionary model (chondan) phatah ahin podoh’e. Paul phat changeija chu Christian thu lhangsap (Preaching) hin Judate thuhil (teaching) dan anajui jingu ahi. Ahin Paul hin teaching² leh preaching³ achomkhennin, aphot dungjuile angaichat dungjujin thuseije ahei. Aman mijouse alen (high) aneo (low) komma leh chondan (culture) jat chomchom kom’a thuseije ahen (1 Cor 9:19-23), houbung thusima din missionary minthang pen ahi.

4. Paul hi theology hilchen thempen le milung joupén, Christian lekhabu sun jouse lah’a khang thusima dinga aminthang pen, chule akitahpen ahi. NT lekhabu akehkhath hi Paul sut ahi. Aman Jesu Christa kipana thupha ho ahilchenin, mijouse ahethem sah’e. Aman Judate dan thuhil chu Jesu chungchang hilchetna dingin alhing joupoi ti atahsanin, Nazareth Jesu chu Pathen’atoh jouse kiphonna chuleh hilchetna ahi ati.

5. Paul hi aphot chetna, amunchetna, gentile te lah’a Pathen’atong ding mi chet chu ahi. Amahi Pharisee (Israel te henga Pathen thutep hethem), Juda mi gamdanga cheng (diaspora Jews) gospel paodang leh lunggel dang (Greco-Roman thought) a ledoh/hilchet thei, Roman citizenship right in avenbit (protect), chuleh hougut (religious zealots), Roman gamsunga houbung atam theipenna phudoh ding lungvul mi ahi.

6. Christianity in Paul lunggel tuh nei (great thinker) ahina’a kon phatchomna lentah aneije. Ajehchu Jesun loupai Pathen’a kon anatoh (lhatdamna natoh) ajo’a chu kichai jengthei ahipon, ahung lona jeh le anatoh ho hilchet ngai ahi. Christian ten hichu alunguva ahethnuva achon naova apohdoh theina dinguva a-Pakai pao natoh chu ahetchetnu ngai ahitoh lhonin Paul’in hoitah’a ahilchenin, Christian doctrine (thuhil) phatah asemboh’in ahi. Ajeh chu athepna (education) jong solchah dangho sanga bulhing jo ahi.

7. Paul gentile te missionary ahi’a konin Christian ten aphot chompi lseh’e. Houbung greatest thinker ahi goh hilouvin natong lenpen jong ahi. Ama Christian ahunghi patna patnin atoh dingin angah jingin, hichu gentilete dinga evangelist/missionary ahi ding chu ahi. Apenthah masanga pat Pathen’atoh achelhah jing vangin solchah dangho chu Paul banga lunglen tah’a Juda le gentile te kibang ahi ti’a phongdoh ngam aumpoi. Hijeh’a chu milunglen, milungpilhing (mijouse ding gel),

² Teaching hi alhangpi’a min aheth khel khat seichetpeh ahi.

³ Preaching hi alhangpi’a min aheth loukhat seipeh ahi.

chihna thepna nei, mijouse ngailutna nei, gentilete henga Palestine khokhela che ding ana ngai khoh ahin; Judate henga Juda, Greek mite henga Greek, Rome te henga Rome, angol (barbarian) te henga angol (barbarian) hithei anangai ahin (1 Cor 9:19-23), solchah ho lah'a chutobang ana umlou laitah'a Paul hi hungkisep doh ahi.

NATURE OF PAUL'S LETTER (Paul lekhatot ho umdan)

Paul khang laiija hin lekhatot hi alhangpi'in jatli in ana ume.

1. Golcha lekhatot (Epistle of friendship)
2. Pachat le themmo channa lekhatot (letter of praise and blame)
3. Philosopher hon athuhiluva mi alutna dinguva atilkhounao lekhatot (a letter which exhorted readers to convert to their particular philosophy) leh
4. Hetpehna/seiphatna lekhatot (letter of recommendation)

Paul'in hicheng lekhatot style hi alekhatotna ajaosah cheh'in ahi. Ahin Paul lekhat jih dan (form) hi Greekte changval lekha kithotto (greek private letter) type ahi. Hichu amasa pennin Introduction, aban Body chuleh achaina'a conclusion (Kimkhatin kipa thusei hi achombeh in lajongleh introduction'a jaotha ahi). Paul khanglaiija lekhatot chedan lhongpi chu

1. **Introduction** (Thumakai): Athotpa, athotho angunga ama le ama gah kiphongdoh masa, hichu kipa thusei/lemna thusei (greeting) in ajuji ji; khatvei veileh athotpa henga amin agahsei goh hilouva a title jong ajaosah tha ji ahi. Hibang chun Paul'in jong amin ajaosah tha teiji'in, atitle chu Jesu Christa solchah tin aseijin, Pathen'in akouna toh aphondoh tha teiji'e. Chukit leh athot khom pi ho jong agah minphah ji'in ahi (cf. 1 Thess. 1:1)

Greek ten lekha akithotto ji tenguleh lemna thusei chu damna dingleh vangboh channa dinga taopehna le a-pathen hou komma vang thumpehna aneiji'un; lekhatot hinthot masapa'in vang ahinboh'a phatthei achan na jeh'a Pathen athangvah na in ajuiji'e. Ahin Paul'in vang Houbung miho jalin Pathen thangvahna aneitei jodin ahi (I Cor. 1:4-9).

2. **Body** (Atahsa): Paul lekhatot ho'a hin hoilaiija atahsa kipan ham het ahahsa ji lleh'e. Ahin mun tampi'a vang Paul'in ahethkenna asem cheh jin ahi (I Cor. 1:13; Gal. 1:11; Phil. 1:12)

3. **Conclusion** (Thuchaina): Greekten alekhatot khumkhanan lekhatot chu amatah'in asut ham ahilouleh a secretary pan asut ham ti aseijiuve. Kahlah lah leh athotpa (sender) langa pat alemho le athot teho (recipient) ho langa alem ho aminphah jiuve. Hibang chun Paul'in jong abolji'in, atamjo'a vang "Jesu Christa lungsetna nachuguva umhen", "nachunguva lungmon umhen" tin ajou ji'e (Col. 4:18; I Tim. 4:22; 2 Cor. 13:14). Chukit leh muntam tah'a athot ho henga ahin taopeh diuvin jong angeh jin ahi (Rom. 15:30; I Thess. 5:25; Col. 4:3; Eph. 6:19,20).

PAUL LEKHA JIH GREEK CHONDAN IN A JO (Influence) DAN:

1. **Greek pao:** Paul lekhatot hohi Greek (koine Greek), chulaija kampao le lekhatijhna'a ana kimangcha paova chu kisun ahi.

2. **Letter form/style:** Paul lekhatot hohi malaija Greco-Roman te lekhatijh style amangcha'e. Akipatdan – koijin koi athot ham, athotpa'a kon athotho salam gabol; Kipa thusei (houlam hihen tahsanlam hijongleh); Athupi: Alekhatot tahsa; chuleh achaina salam leh thuchaina kiboldan hohi abona Greco-Roman lekhatijh dan ahi.

3. **Philosophical ideas** (chihgilna lunggel) amanchah dan: Lunglhaina (contentment), Pakai Pathen chapa, thilkidang (mystery), alhintah'in (fullness) kitiho chungchanga lunggel; Chuleh muntamtah'a kivaipohna (politics), golseh (games), kiveina lampang (commerce), chondan dih/thildih (legal matter), soh'a kivei etc. amangchah hohi Greek chondan le philosophy toh kibang ngen ahi.

4. **Thil ni seikop** (dualistic principle of mystery religion) amangcha'e: Muthim le khovah; tahsa leh lhagao; tahsami leh lhagao mi; milui le mithah; tulai khang leh ahunglung ding khang; Adam masa leh Adam nunung etc. tiho amangchan ahi.

5. **Gnosticism⁴ to kinel na:** Paul'in Gnostic ho in tahsa huhhingna hi hetna/chihna (knowledge)'a kon ahi atiu chu anelkalin Jesu Christa'a kon ahi atin, a Cross hi huhhingna ahi ati.

PAUL LEKHATHOT HO KIHOPKHEN DAN

Agam dungjuija kihop khen:

1. Macedonia gamma houbung thum ho dinga lekhatot: I & 2 Thessalonians leh Philippi.
2. Greek Gamma lekhatot ho: 1 & 2 Corinth
3. Asia gamma houbung thum ho lekhatot: Colossians, Galatians leh Ephesus.
4. Italy gama Houbung dinga lekhatot: Romans

Changval lekhat li: 1 & 2 Timothy, Titus leh Philimon

Asunga athu dungjuija kihop khen kitdan chu:

1. Eschatological Epistle (Ahunglungding chungchanga lekhatot): 1 & 2 Thessalonians

⁴ **Gnosticism** hi Greek pao *gnosis* tichu *knowledge* (*hetna*) akon kiladoh ahin – chunglam Pathen umna lam lhun theina chu hetna'a kingam ahi, ti tahsan ahi. Hiche hi houbung masa holah'a Christian khat bangan ana kilangan ahi. Gnostics hon Pathen hi chamkimtah Lhagao – Thengset, leiset thil (matter) to kitimat (associate) theilou ahi atiuvin; Jesu chu thilsem jouse sempa Pathen hithei louding ahi atiu ahi. Mihem hi Pathen to gamlhatah'a kigamlhat ahitai, ahin atahsa, hinna, Lhagao hi gnosis vanga oltah'a Pathen kom naicheh cheh'a, akhon naleh Pathen toh lhagao khatna hingkhom ahi atiu atiu ahi.

Amahon thiljouse mihem tahsa jong aboh (matter is evil) ahin, iti danna Pathen chu mihem tahsa'a Christa'a hungthei ham? atiuve. Gnostic kimkhat ho dingin Jesu chu mihem tobang maimai (seemed) danin agelun, theophany (Pathen mihemho henga OT'a anakiphondoh naho) dan in agelun, tahsa'a hung dingin agelthei pouve. Alangkhatna Gnostics kimkhaton Christa mihem ahina hi asangun ahi. Ahin aPathen hina chu asang bukim thei kitpouvin, Pathen hilou, miphatah, Baptism achanna chu Pathen'in achah'a asimin agellun athi'a chu Adallah kit ahitan, Cross'a athi'a chu Pathen banga thi hilouva, mihem mai mai ja thi ahi atiuve. Hitobang Gnosticism hohi Adoptionism akiti.

2. Soteriological Epistle (Huhhingna chungchanga lekhatot): 1 & 2 Corinthians, Galatians leh Romans.

3. Christological Epistle (Christa chung thu'a lekhatot): Philimon, Colossians, Ephesus leh Philippians

4. Ecclesiological Epistle (Houbung chungchang thu'a lekhatot): 1 & 2 Timothy leh Titus.

ROME MITE HENGA PAUL LEKHATHOT

Rome mite henga Paul'in lekha athot hi lekhatot dang jouse toh akikhehna aumin ahi. Hiche hi Paul'in a'itih'a amu khah louleh akihetpi khahlou houbung dinga asut ahi.

AKISUTPHAT LE AKISUTNAMUN:

Paul'in hiche lekha thot hi kum AD 56-58 vel laiija Corinth khopi'a kon ajih ahi. Hiche hi a 3rd Missionary kholjin laiija Corinth'a lhathum acham (Jan-Mar, AD 57) laiija asut ahi. Hiche hi Ephesus'a kum thum aga cham nunga ahungkile doh jou ahi.

ROME HOUBUNG:

Rome Houbung hi koi phudoh ham hetchet ahipoi. Ahin Christianity hi Rome'a Paul agalhun masanga ana lhung ahitai. Acts. 28:15 in Paul chuche gam agalhuna Rome'a Christian ten ana lemdanu aseije. Ahileh kipana thupha hi iti danna Rome analhung ham? Kon Rome houbung hi ana phudoh hintem?

Roman Catholic tradition'in vang Rome houbung hi Solchah Peter phudoh ahi ati. Amahon Peter hi Rome'a Nero noiija Martyr chang ahi tin atahsanun ahi.

Ahivangin akilomjo leh tahsan umjo chu Christian mi lham maimai hon Rome houbung hi anaphudoh'u hinte ti ahi (Acts. 2:10; 10:1; 18:2-3).

Solchah bung 2 na'ah Penticost mang dingin mi tampi muntin gamtin'a konin ahungun, Rome'a kon in jong ahung jaopha'ui akiti (Act.1:10). Hiche'a penticost ni'a hunga Peter thusei hungja kha'a apengthah ho khat chun Rome houbung'a akile kitna chu kipana thupha hi alhangsap le'a houbung hi atundoh hinte tihi tahsan umpen ahi.

Kimkhat kitchun kiveimi khat'in Paul thusei Corinth khopi, Antioch khopi, Ephesus, Philippi ham'a ahung jah'a kon pengthah'a Rome houbung alelhun kitna kipana thupha hi alhangsapma houbung hi aphudoh hinte tin jong atahsanui.

Rome mite henga Paul lekhatot hi atumbek'a gentile, Juda, ahilouleh agomuva ding ti jong akijih poi. Rome khopi'a chu Juda Christian, gentile Christian chuleh house-church (Inn hou'in) tampi jong um ahijeng vangchun Paul'in aboncha keijuva dingin general tah'in "Rome'a cheng mitheng'a kikou Pathen deite jouse henga" (1:7) tin athotnin ahi.

ROME KHOPI:

Rome lenggam sunga dinga Rome khopi hi athupi pen leh amanlu pen chuleh a capital ahi. 753 BC in anakiphut doh'in, ahin Bible'a vang NT'a bou ahung kimu chen pannin ahi. Rome hi Tiber vadung panga um ahin, Mediterranean tuipi'a kon mile 15 gamlha ahi. Paul khanglaija chun akhopi sung chu mi million khat sanga tam achengun, amaho lah'a tampi chu Soh ahi. Akisei dungjujin Rome khopi lamlen laija mithum kijot ho chu ivetleh 2 chu soh ahiteije akiti. Rome hin akhopi sunga building/in leh mun thupi tahtah aneijin hiche ho chu: Emperor Palace, he Circus Maximus, the Forum kitiho hi ahi. Hichehohi Rome ten akiletsah pi lleh jeng vangun akhopi sunga slum (mi vaicha, khutdoho uman) chun ahoina jouse asumang jouvin ahi. Tradition dungjujin Paul jong hi Rome khopi pamlam Ostain lampi'a chu Nero lengvai poh (AD 54-68) laija martyr ana changa ahi.

LEKHATHOT KIJOHLO

Paul'in alekhathot ajih lona ajeh apeh dungjujin:

1. Lhagao lam thil peh amaho toh chankhom ding anopjeh (1:11-12)
2. Gentile te lah'a Ga aneibanga Rome mite lah'a jong ga aneinom jeh (1:13)
3. Rome'a cheng ho henga kipana thupha seiphong ding aha lungvul jeh (1:15)
4. Kipana thupha alung khah louna mun Spain gamma Missionary natoh thah apat nom jeh'a Rome khopi'a um houbung hon akithopi dingu angaichat jeh (15:24-28)
5. Paul'in a Pathen'atoh nahi kichat le tijat umtah dinmun ahi ti ahet jala Rome a um tahsan ho henga ataonao angaichat jeh (15:30-33)
6. Rome khopi'a solchah khatcha jong aumloujeh'a aumding khohsah na jalla agache ding ahetsah na.

ROME LEKHATHOT SUNGA PAUL LUNGGEL THUPI HO

1. "*Tahsa leh Lhagao*" (Flesh & spirit in Romans): Old Testament dungjujin 'tahsa' (Hebrai. *Basar, she'er*) hi mihem tahsa (ganhing'a jong); sa, phele vou kimu thei leh kinethei kiseinan akimangin (Ex. 12:8; Dan. 2:11; Gen. 6:3; Isai. 11:5...) ahi.

Ahin Paul'in OT'a to kibang lou tah'in tahsa hi:

- a. Mihem tahsa/tipum maimai mitna muthei (Rev. 2:28; Gen. 17:11) toh kikal in amangcha'in ahi.
- b. Tahsan ho amilui'u/ahina lui'u seinan amangin ahi. Paul'in katahsa atitengleh Adam'a kona aneison chonsetna chu aseina hiji ahi (6:6)
- c. Kikhelna/Pentah na neiloulai mihem jouse hina (nature) seinan amangin ahi. Mipengthah khat chu tahsa'a umjongleh tahsa lama chonlou ding ahi (8:8). Hijeh'a chu Paul'in tahsa hi mipengthah lou ho hina (unregenerated nature) seinan amangcha jin ahi.

Paul lekhatot ho'a hin tahsa le lhagao hi kikal in amange. Christa tahsan khat chu tahsa mi hitalouva lhagao mi joh ahi ati (8:9). Amaho tahsa lamma achon pouvin, lhagao lamjoh'a achonun ahi (8:4). Amahon tahsa lam natoh apodoh pouvin lhagao ga joh chu aneijui (Gal. 5:19-20). Muntam tah'a jong Paul'in Lhagao le hinna/lungthim (spirit & soul) hi kikal tah'in amange. Angaina'a mihem khat chu hinna nei (*psuche/soul*ish man) atin, lhagao mi khat chu spiritual man tin amangcha'e (*pneuma, pneumatikos*'a kon kiladoh). Hijeh chun Paul'in lhagao ati hi mihem khatnin asunga Pathen ahet dohna (God conscious element) aseina ahi.

2. **Chonphatna** (righteousness) ahilou leh **chonphatchan** (justification): Paul'in chonphatna amanteng Pathen toh kigui jopna dih seinan amangjin ahi. Michonpha kiti chu Pathen toh kigui jopna dih nei tina ahi. Gentile te lah ahin Judate lah ahin Paul'in akhol chilin, Judaten chonphat chunganga changa boina hi danthu juivanga suhlhap ding agouvin, ahin solchah Paul'in vang Pathen lunglhai na chanhi chonphatna ahi ati.

Chonphat channa hi Pathen'a kon bou ahin, hichu Pathen'in: i) Lungset vang (3:24); ii) Tahsan vang (3:22); iii) Experience (hinkho'a thilto) vang (5:1-4) chule, iv) natoh vang/tahsan anatoh'a photchet (Jacob. 2:1-23) ho vanga bou achan ahi.

Pathen angunga chonpha'a sima ium theina dinguvun lam pi khatsch bou aume. Hichu Pathen chapa changkhatseh Jesu Christa lhatdamna natoh tahsan vanga kon bou ahi (3:21-31). Hiche tailou chun thildang jouse Gentile te ding ahin (1:18-32), Judate ding (2:1-3:20) ahin apanna bei ngen sen ahi.

Chidang namdang itidana chonphatna chang jou louham aseina'a (1:18-32) gentile ten achonset nao chunganga amaho mama in mo akipoh dingu ahi ati. Ajeh chu Pathen thilsem ho'a akiphong doh'in, hichu amahon asunguva selepha hetna'a konnin ahenaovin (1:19-20) ahin amahon Pathen'in akihetdoh sah'a na chu ija seplouvin milim houna – asempa hou tah saning athilsem houna joh'in amang taovin ahi (1:21-25).

Chuleh Judate chun Pathen chu aheuvun, danthu jong aneijun, hichechu akiletsah piuvun, ahin Pathen lungdeija chon ding agopouvin ahi (bung 2). Hijeh chun Judate ahiuvun chidang namdang te ahiuvun kiletsahna leh kihoitho sahna ding mun aumpoi. Pathen lungdeija chon umlou, Pathen mitmu'a chonse ngen ahiuvun (3:10), Pathen lungdei chang joulou, abonuva thakhat ahiuve. Hijeh'a chu Pathen san le pom ihi theina dinguva lampi umsun chu Chonphat vang ahin, hiche chonphatna chan theina dinga alampi umsung chu tahsan, Christa tahsan chu ahi.

3. **Dan** (law): Dan (Gk. **Nomos**) hi Rome lekhatotna 70 vei valjen akimun, ahin aman na chomchah ahin, akibang soh keipoi.

a. Pentateuch (Danbuho Gen-Deut). 3:21b na'a 'Dan' kimu khu OT lekhabu masa 5 ho kiseina ahin, NT'a jong akiha manchah'e.

b. Dan hi OT pumpi seinan jong akimangin ahi. 3:19 na'ah Paul'in "Danthu..." ati khu achunganga chang 10-18 na aseina ahin, ahin hiche Bible chang ho khu Psalms le Isaiah'a kon na kilason ahin, hijeh chun 'dan' khun OT pumpi ahopsah kei ahi.

c. Principle (tahsan na danthu) seinan jong akimange. 3:27 na'a Pathen milungset na in mijouse tahsan vangin them achan sah/chonphat achansah'e atin, hiche tansan na chu dan (principle), mihemin Pathen angung alutheina dinguva lampi chu ahi. 7:21 na'a Paul'in alungunga kidouna aseina khu Principle ahi.

4. **Ahat leh alhasam/ahatmo** (the weak & the strong): Corinth houbung lhahsamna leh kupal lhuhna chu 'sa' ahin, Rome houbung mite lhahsamna kiseiho vang: i) Anche me ne (14:2) ii) Nikho khat atumbah'a nit (14:5) iii) Lengpi twija kon kikangse (14:21) ho ahi. Hiche chungchanga hin Paul'in ahatnin ahatmo asinmo louding; chuleh sopi khat kupal lhuh na ding ahileh bollou dingin ahilin ahi.

ROME LEKHATHOT SUNGA ATHUPIHO

1. Kipana thupha thaneina (1:16-17)
2. Ingaichatna chunguva Pathen lungsetna (3:23-24)
3. Tahsan vanga chonphat (5:1)
4. Chonset man leh hina ga/thilpeh (6:23)
5. Chamlhatna neiho/huhhingna changho dinga hinna thah (8:1,2)
6. Christa ngailut na toh iman eichomkhen theilou dinga ahi (8:35-39)
7. Pathen lahthei dol tah'a kipeh (12:1-2)
8. Bible chung changa tilkhouna (15:4-6)

ROME LEKHATHOT NA THUCHENG THUPI HO

1. Dan (78 times), 2. Christa'a/in Christ (33 times), 3. chonphatna (66 times), 4. Tahsa (20 times), 5. Tahsan (42 times), 6. Pathen'in aphallou (God forbid – 10 times).

ROME LEKHATHOT OUTLINE

1. Introduction – 1:1-17
2. Pathen chonphatna lui le Pathen chonphatna thah – 1:18-4:25
 - a. Chonphatna lui – 1:18-3:20
 - b. Chonphatna thah – 3:21-4:25
3. Christa'a hinkho thah – 5:1-8:39
 - a. Christa vanga hinkho thah – 5:1-21
 - b. Chonset na thina leh Christ'a hinna thah – 6:1-7:6
 - c. Thina lampi leh hinna kikal(contrasted) – 7:7-8:39
4. Israel te leh Pathen'in huhhingna lampi agon – 9:1-11:35
 - a. Amite chung Paul lunghemna – 9:1-5
 - b. Pathen'in amilhen chung changa chamlhatna – 9:6-29
 - c. Israel ten apaijeh'uva thil lhung – 9:30-10:21
 - d. Phat chomkhatna dinga kipaidoh – 11:1-36
5. Christian hinkho kimanchah na dinga hilna – 12:1-15:13
 - a. Christian te mopohna – 12:1-13:14
 - b. Houbung sunga ahat le ahatmo – 14:1-15:13
6. Khumkhana (Conclusion) – 15:14-16:27

CORINTH MITE HENGA PAUL LEKHATHOT KHATNA

CORINTH KHOPI

Corinth khopi hi Greece lhanglam (S) ma um Athen khopi'a kon lhumlam 45 km banga gamlha khopi lentah khatleh khopi luitah khat ahi. Hinlah 146 BC in Rome ten ana suseu vin ahi. Amun hi kiveilena dinga mun kitup tah leh hoitah ahin, kong kaimun thum aume. Ana suseu jongleo Julius Ceasar in athi masang jep (44 BC) chun ana sathah kitne. Corinth khopi hi Greece te'a dinga goh hilouva Mediteranian gam tamtah, North Africa, Italy, leh Asia Minor ho'a dinga kiveina munthupi

tahkhat (major trade centre) ahi. Corinth khopi hi soh'a konna chamlhat kiveimi tamna ahijeh'in chidang namdang hou dih lou (pagal cults) atam lneh jengin, huh leh jonthan hoi, jukham le chonchatvai na jengjong hi hou min (name of religion) in aneijui. Houbung boina jeng jong hi pamma kon hilouvin asunga kon ngen ahi.

CORINTH HOUBUNG

Corinth houbung hi Paul'in a 2nd Missionary Journey lai ja ana phudoh ahi (Acts. 18:1ff). Paul Corinth khopi'a lha somle get bang (49-50 winter -51 summer) sung athame. Paul'in Corinth mite lekha athot phabep lah'a 1 & 2 Corinthians bou hi NT sunga ajaovin, adangho vang canon ahipoi.

Paul'in Corinth mite'a dinga lekha athot phabep hetdoh thei ho chu:

1. Pre-Corinthian letter: Paul'in I Cor 5:9 na'ah Jonthan hoi pan ho'a kon akikangse na dinguva alekhathot thu aseijin ahin, hiche lekhatot sunga chu ipi thudang uma itih'a athot ham jong aki hepoi.

2. A letter from Corinth to Paul: Hiche hi I Cor. 7:1'a akimui. Corinth hon Paul'a konna aboinao suhlhapna dinga hilna (advice) angai danna aseina letter ahi. Hiche letter hi Paul'in Ephesus'a aumlaija amu ahin, a 3rd Missionary kholjin lai ahi.

3. I Corinthians: Corinth miten angaichat'u dungjuija Paul'in hiche lekhatot hi aboina hou chung chang thu'u seilhap pehna dinga ahinsut ahi. I Cor. 16:1-9'a kimu dungjuijin hiche letter hi Ephesus khopi'a kon a 3rd missionary kholjin lai ja (AD 55) ahin sut ahi.

4. The rebuking letter: Paul'in Corinth khatvei houbung agavila chu aboinao suhlhap ahideh loujeh'in avella agavil kit sangin amaho dingin lhaset umtah, phosal na lekhatot athot joi (II Cor. 2:1; 7:8). Hiche hi Ephesus'a kon na I Corinth athot jouva Titus khutna kona athot ahi.

5. II Corinthians: Paul'in phosalna lekhatot toh Titus Corinth'a asol jouvin Ephesus adalhan Troas lamma Titus'in Corinth'a konna thupha ahin pohding kinem in ache'e. Ahin II Cor. 2:12,13 in Titus chukomma ana umpoi atin, hijeh chun Paul Mecedonia'a ache'in Titus toh akimu ton akinepna bangin thupha ahin pon ahileh, hijeh'a chu Paul'in 2 Corinthian hi akipa jal le akicham kitna diuva athot ahi.

1st CORINTHIAN KIJIH LONA

Christian hinkhole tahsan chung changa boina houbung sunga hung sohдох ho suhlhap an ding leh suhtup na dinga kijih ahi. Corinth houbung boina ho chu:

1. Houbung sunga kikhen telna (1-4)
2. Houbung sunga jonthan hoi (5-6)
3. Thutan na in chung changa kinel na ho (6)
4. Jonthan hoi jinei le neilou chung changa boina (7)
5. Saneh chung changa kiboina (8-10)
6. Hou'in kai chung changa kiboina (11)
7. Lhagao thilpeh chung changa boina (12-14)
8. Thokit chung changa boina (15).

BOINA PHABEP SUHLHAPNA

1. **Houbung Sunga Kikhen Telna** (1-4). Corinth houbung boina masapen chu Houbung member kah lah'a kikhen telna ahi. Amaho khat loijin Paul'a kahi, khatloijin, Apolo'a, kimkhatnin Peter/Cephas'a kahi tin akikhen telui. Hijeh'a chu Paul'in Houbung sunga kikhentelna hi Pathen hetlouna ahin, hiche hi kilungto na'a suhlhap ding angaije ati. Paul'in kei kahin, Appolo ahin, Peter ahin, khat alei bol, khat aphut, khat twichap bou kahiue; abul (foundation) chu Pathen Christa Amatah ahin, ahin sahleh akhansah'a Pathen bou ahi ati. Hijehchun kilungto theina dingin achung nung ding kichu jolouvin, soh hina lungthim neicheh ding angaije ati.

2. **Houbung Sunga Jonthanhoi** (5-6). Houbung sunga hin lomlou tah'in pasal khat apa ji (anu thah) toh lumkhom aumin, ahin amahon hichu paidoh sangin kiletsah pinan anei jouvin ahi. Paul'in hitobanga chonho chu Houbung sunga kon paidoh'a satan khutna pehdoh dingin athupeh'e. Ajeh chu mikhat jeh leh mikhatna konna chu houbung pumpi suhsetna umthei ahi ati (5:6)

3. **Thutan Na in Chung Changa Boina** (Ch. 6). Corinth houbung mite chu akah lah'uva boina aumteng asunguva suhtup'a suhcham tah sangin achung thu'u tan ding leh seitoh dingin chidang namdang Pathen houlou ho komma achejiuvin, hijeh chun Houbung sunga chun minsetna ahin lhutlo taovin ahi. Hijeh'a chu Paul'in Christa tansante chun houbung sunga boina leh houbung mi boina chu ahithei channa amaho lah'a akisuhtup/akisuhlhap dingun ahetsah'in ahi. Ajehchu amaho achung nungpen hiuva ahin, vantilte thu jengjong tanding ahieuve. Chidang namdang chonseteho anga kihah hi angai ahipoi. Hijehchun chonse ho anga kihah'u ahi amaho kisuse ahuiuin, Pathen loupina akilang poi ati (v 8)

4. **Jonthan Hoi/Jinei Chung Changa Kikholna** (6-7). Paul'in khangdong jinei loulaiho henga jonthan hoi le jinei chung changa aseina'ah: mihem khat chu Pathen natong dinga akipeh doh, ahinkho lhumkeija theng sela umdinga akigel lhah tilouvin jinei louvin umdahen ati. Ajehchu lungthimse pum leh kitimlel pumma um'a jon sangin jinei ding aphajon, Pathen lunglam jong ahi ati. Chuleh nupa chung chang thu'a ahilna'a: Nupa chu ahithei channa kikhen kanglouva achan dingdol kipehto jingding ahi ati. Pasal'in achunga thuneina aneipon, chutima bangchun numeijin jong atibah chung thuneina aneipoi. Khatjoh sang johchu khat joh thuneina ahi. Hijehchun chomkhat kahlah'a dinga kinopto'a Pathen thu'a kimangcha dinga akikhen lhon tilouvin nupa chu kikhen kang lhonhah hen tin thupeh aneije.

5. **Saneh Chung Changa Boina** (8-10). Christian khat chun lungtheng sela imacha donglou leh khol louva kailhanga kimu sa ahilou leh thil chu aneh jengthei ahi. Ajehchu chulai khangha Corinth'a chu sa atha tenguleh asunga (asa'a) thilphalou lhagao phalouva kona natna thei le thina thei achuh louna dinga a pathen henguva akatdoh uva, apathen'u masanga chu themkhat aneh denu, chule aneh moh'u chu kailhanga ajoh jiu ahi. Khat chun sa chu milim anga kikat ham hilouham ti'a doh angaipon, lungtheng sella ineh leh ase ahipoi. Ahin Pathen houlou khatchun Christian khat'in hitobang milim angunga kikatdohsa sa chu neh adihpoi ti'a aseija sopi khat alunglhah'a kipalna anei sanga, Christian khat chu Pathen thu amachalna dinga asa neh chu angah ngai ahi tin ahile.

6. **Hou'in Kai Chung Changa Boina** (11).

a. Numei pon lukhuh khuh (vv. 2-16). Paul'in numeijin Pathen hou petna alu akhuh chu adan ngai ahi ati. Ajeh chu numei pon lukhuh khuh hi Greekte le Romete pathen houna'a jao ahi goh hilouva, Juda mite leh jenga jong pon lukhuh kikhuh hi chena khat ahi. Pon lukhuh khuh dinga ahilto lhonin ajeh jong thum apei. i) Numei chu apasal te'a dinga loupina ahi (vv.7-9). ii) Vantil teho jala numeijin athuneina melchihna'a alu akikhu dingu ahi (v.10). iii. Numei samsao hi amel hoina le aloupina ahi (13-15).

b. Antheng jon chung changa boina (17-34): Anhang jonna'a hin kimkhatnin vasetnin aneovin kimkhat achang jouji pouvin, kimkhatnin akham piuvin, aha le avai kah'a kikhenna aumdoh'in ahi. Hijeh'a chu Paul'in thutan na hunglung ding le akikhol chilna dinguva ahil ahi (27:32). Hitobanga Pakai anhang jon asuh boh'u hi Christa thi ataitaom nao ahin, achuti jeh'uva alah'uva dammo le thina gei toh jong uma ahitai.

7. LHAGAO THENG THILPEH CHUNG CHANGA BOINA (12-14). Lhagao thilpeh hin Corinth houbunga boina ahin lhutne. Ajehchu kachenge tiho le achanglouho kah'a kikhena ahin lhutnin, lhagao thilpeh changhon achanu chu amanje ahethemlou jeh'un Pathen houkhom suhboi nan amangu, khatnin achan kiletsahpi'in adang khat noise'in abolin ahi. Hijeh'a chu Paul'in suhlhap na dinga:

a. Mijouse lhagaothilpeh chomchek changa ahi (12:4-11), ahin abonna Christa tipum khat ahi (12:12-26), amaho chu kigoma houbung apilhin sah uva aphudetnu ahi (12:27-31) ati.

b. Lhagao thilpeh ijat umhen, kichang jongleh ngailutna hi achungnungpen ahin, ngailutnan abonin ahopsoh keijin ahi (bung 13)

c. Lhagao thilpeh hohi houbung machalna, khantouna le kitilkhouna ding ahidan ahilchenin ahi (bung 14).

8. THOKIT CHUNGCHANGA BOINA (15). Houbung sunga mi kimkhatnin tahsan ho thokit na aumpoi atiuve. Hiche hilchenta dingin Paul'in Christa thokit dan thu ahilchennin (vv.1-11), Christa chu athi'in nithum nin athoukitnin (vv.3-4), athodoh kit hettok sah le amu'a tampi thu aseijin; anukhah penna amatah'in amuthu aseijin ahi (vv.5-11). Chule Paul'in atahsan ho thokit ding thu chu athiho baptize chan thu'a ahil chenin ahi (15:29). Thokitna aumlou leh ipi dinga gentheina kithoh khoh khoh'a ham? ati (vv.30-32). Achainan thokit nung teng umchan ding dan hoitah'in ahilchene (vv.35-58).

OUTLINE

1. Thumakai (1:1-9)
2. Houbung sunga kitomona (1:10-4:21)
 - a. Kipumkhomna angaikhoh dan (1:10-3:23)
 - b. Soh hina apoimo dan (4:1-21)
3. Houbung sunga jonthan hoi (5:1-6:20)
4. Houbung sunga kichen thudol (7:1-40)
5. Houbung sunga chamlhatna (8:1-11:1)
6. Houbung sunga Pathen houdol (11:2-14:40)
 - a. Houbung sunga pasal le numei mopohna (11:2-16)

- b. Pakai jan anjon (11:17-34)
- c. Lhagao thilpeh ho (12:1-14:40)
- 7. Houbung kinepna: Thokit (15:1-58)
- 8. Houbung mopohna (16:1-24)
 - a. Lhacha natos (16:1-4)
 - b. Changval tohgon le chibai (16:5-24)

CORINTH MITE HENGA PAUL LEKHATHOT NINA

Paul lekhatot jouse lah'a 2 Corinth hi achungchang thu leh ahina ahaseina pen (most personal letter) ahi.

LEKHATHOT KIJIH LONA

1. A 3rd Missionary journey laija Philippi'a aumlaijin Titus in alekhat thot masa (rebuking/severe letter) chu lungthim kish pumin asang naove tin ahung hilin ahi. Hijeh'a chu alung kish chung changuva akipa hetsah na'a hiche lekhatot hi asut ahi (7:8,16).
2. Paul hi seijui 12 lah'a jaolou ahijeh chun mi phabep khatchun Paul lunggel sonlelna leh Paul solchah ahina atahsan lelun ahi. Hijehchun amahon houbung sunga Paul lamkaina anel kalun Houbung sung chu avela asuhboi kit theidingu dinmun in aumin ahi. Hijeh'a chu Paul'in 2 Corinth hi hitobang boinaho amachal louna dinga solchah ahidan ahuhbitna/venbitna'a athot ahi (1-7)
3. Corinth miten Jerusalem genthei kithopi na dinga tolom (collection) ana kisah kholna dinguva agah hetsahna ahi (8,9)
4. Chuleh solchah dihloho kimaitopi na'a hiche letter hi asut ahi (10-13).

CORINT HOUBUNG LEH PAUL KIGUIJOPNA

1st Corinth dungjujin Paul'in Corinth Mecedonia'a ache joule agavil nome ti akimui. Ahin hichu Penticost jou kah'a dingin ana tepchone. Hijeng jongle Paul'in Timothy chu Corinth'a asolin ahileh athu hinlhut chu Corinth houbung mite chu 1 Corinth athot jouvin alhasam/lhasuh deodeu uve ti ahi. Hijeh'a chu Paul'in:

1. Timothy ahunglhun chun Paul Ephesus'a umlai ahin, amatah'in Corinth chu lungna tah'in agavilin ahi (painful visit) – 2 Cor. 2:1; 13:2
2. Paul'in aniveina'a Corinth aga vil jouchun lunghang tah leh lungthim nomma tah'in ahung kilen ahi. Hichejou chun Paul'in Corinth mite dingin lekhatot khat Titus apohsah'in athotne. Hiche lekhatot chu Paul'in mitwi tampi puma ajih goh hilouvin (2:4) Corinth mite din jong lunghemna nasatah alhutne (7:8-13) ti athotpa Titus'a konin ajan ahi.
3. Ahin hiche phat lai tah'a chu Paul Jerusalem'a dinga tolom chung changa akisah lel behset jeh'in Corinth agavil pai theipon; lekhatot 2 Corinth joh hi asola, asatah'a AD 56 kichai lama Corinth agaphah kit ahi (Acts. 20:2,3a)

PAUL DOUDAL HO (Paul's opposition)

1st Corinth'a houbung boina chu atamjo amaho sunga kona ahin, ahinlah 2 Corinth'a vang achombeh'e. Boina hi midang chung hitalouvin Paul amatah chung chang ahi. Hichehi pamlama mi naicha'a Corinth houbunga hunglut ho'a kon ahi (11:4). Hitobang miho chun Paul alamkai na anel kalun, solchah ahina ajahnom pouvin ahi.

Paul'in changmel tah'in amaho aphoh salin/themmo achanin ahi. Akeh'in bung 10-13 sung hi amaho chu solchah dihlu/solchah lhem ati'in (11:13), Satan sottolle ho atin (11:14-15) ahi. Paul'in amahochu kipana thupha dang le Jesu dang ama mama (Paul) message'a kon in ahilun, ahin Corinth mite chun thanom tah'in asangui ati (11:4). Hitobang miho chu athusei thep'u akiletsah pi'un (10:10; 11:5-6), anatoh doh hou cheng chung akitabolthei sah'un, midang toh leiset lam thudol danin akite kah ji'un ahi (10:12-27; 11:12,18). Amaho alhagao mit danu leh athil kidang bolthei thahat naova aki songun, Paul chu lhagao milou danin angoh'ui (10:2-4; 12:12). Amahon Juda mi ahinao akiletsah piuvun (11:21,22) Gao thilmu amu hou leh athil to hou chung ahi satheijun ahi (12:1) tin Paul'in ahil chene.

CORINTH HOUBUNG SUBOI HO

Corinth houbung sung hung choh boi ho hi ajat tam tah leh group chom chen in akiseijin, ahin eihon hilaija 4 bou veo hite.

1. JUDAIZER: FC Baur in Corinthian lekhatot doudalho chu Judaizer kiti – Judea'a kona Jerusalem solchah ho thalheng'a hung, Judami lamdih/dandih tah'a Christian hou pom (legalistic Jewish Christianity) ho thalhenga hung, Solchah pipui chungnung ho (super apostle) kiti (11:5; 12:11) ahiuve ati.

2. GNOSTICS: Tulai khanga Bible hilchen tamtah'in 1st Corinth'a boina bol kiseiho chu Gnosticism pomho'a aseivangun, Judaten Gnosticcho hi solchah pupui chungnung ho 2nd Corinth'a Paul doudalho danin amuvun ahi. Amaho chu solchah kihisah, solchah lima kitem ahiuve (11:13). Amanhon Jesu dang ahung hillui (11:4). Hitobang Gnosticism hohin 'hetna jeh'a sochatna (salvation by knowledge) apomun, leiset chung a um jouse athenglou (matter is evil) ahi ti atahsanu to lhonchun Christa mihema apen leh atho doh apom pouvin ahi.

3. HELLENISTIC JEWISH CHRISTIAN MISSIONARIES: B Born Kamn sei danin 2nd Corinth dungjuja boina sem hohi Hellenistic Jewish Christian Missionary (Judami Greek chondan jui Christian missionary) ho hinte ati. Amaho chu Greek chondanin a influence (ajo) mama jengu ahi. Amahon amaho le amaho chu "Pathen mi"(devine man) danin akimu'uvun, Pathen lhagao chun amaho masanga Mose le Jesu Christa aumpi/atomkhum (embodied) banga aumpi danna kingaito'u ahi. Amahon abol thupi'u chu; Bible Pathen thu hilchet, thusei them (rhetorical skill) le thil kidang bol hohi ahi.

4. PNEUMATIC: J. Sumney gel dannin hiche Paul doudal hohi Pneumatic ho hinte ati. Pneumatic (lhagao mi/spirit person) hohi Juda mi kahi ti'a, ahi'a lah Judaizer jong hilou, Jerusalem toh kimatna jong neilouho ahiuve. Amahon lhagao natoh chung changhi aha boipi/khohsah un ahi.

Achom lamma seidingin Corinth houbung suboi ho chu Juda mi, athusei thepu kiletsahpi ho, mitna mutheija solchah dihtah thalhenga kingaitoho ahiuve.

PAUL HINKHO'A THILLHUNG PHABEPHO

Paul'in lekha thot dangho sangin hiche lekhatotna hin achung chang thusim aha seije. Aman ahansan na leh ngailut jala ama le ama akipeh doh dan aseijin, kiletsah kiloupisah chung chang 31 vei aseijin, chuleh achunga thil lhungho jong aseije.

1. Damascus'a kona asochat thu aseije (11:32,33)
2. Van thum chan geija achethu aseije (12:1-4)
3. Atahsa chung ling thudol aseije (12:7)
4. Kilom lou tah'a athoh gimna thudol jong aseije (11:23-27).

OUTLINE

1. Paul lemna thusei (1:1-11)
2. Paul natoh (1:12-7:16)
 - a. Paul tohgon (1:12-2:4)
 - b. Doudal ho gotna kipeh (2:5-11)
 - c. Titus umlou (2:12,13)
 - d. Lhacha natoh umdol (2:14-6:10)
 - e. Corinth mite kitil khouna (6:11-7:16)
3. Paul tholom (8:1-9:15)
 - a. Thil peh dol (8:1-9)
 - b. Thil peh jeh (8:10-15)
 - c. Thil peh dingdan (8:16-9:5)
 - d. Thilpeh pedinga kitepna (9:6-15)
4. Paul solchah hina (10:1-12:13)
5. Paul kholjin (12:14-13-14)

GALATIA HOUBUNG MITE HENGA PAUL LEKHATHOT

ASUTPHAT

Galatia lekhatot hin amin hi Paul'in Asia minor (tu'a Turkey) gamma houbung alekha thot ho'a konna akilahdoh ahi. Hiche lekhatot hi Paul'in khopi khat sanga tamjo henga alekhatot khat seh chu ahi (1:2; 3:1; I Cor. 16:1). Bung 2 na'ah Paul'in Jerusalem Council (Acts. 15) ache thu aseijin, Scholar phabep in Jerusalem Council hi AD 49 ahi ati jeh'un Galatia lekhatot jonghi hiche joujouva kijih hiding ahi. Kimkhat kitchun Galatia hi Paul lekhatot masa pen ahi atiuvin, Antioch'a kona Jerusalem conference/council masanga ajih ahi ati'un, chuleh 2nd Missionary journey masang ahi atiuvin, hichu ahileh AD 47 hinte atiuve. AT Robertson'in Paul'in Galatia hi Corinth agavil nukhah pen (Acts. 20:2-3) na ajih ahin, AD 56-57 vel hinte ati.

ATHOTHO (Recipient)

Paul phat lai jin Galatia hin hilchetna (meaning) 2 aneije. Namkai (ethnic sence)'a seidingin Galatia hi Asia Minor lailung (central)'a um Galatia miten chenna aneiju gamkai sung ahi. Hichehi Northern Galatia jong akitin, hiche gamkaija hi Paul nivei lang alutkhah (Acts. 16:6; 18:23) vangin Houbung aphudoh akimupoi. Ahin Paul'in southern Galatia'a houbung phabep aphutdoh'e. Hicheho chu Pisidian Antioch Houbung (13:14-50); Iconium (13:51-14:17); Lystra (14:8-19 cf. 16:2) chuleh Derbe (14:20,21 cf. 16:1) ahi. Hiche khopiho hi Rome lenggamsung Galatia gamkai sunga uma ahijeng vangin, Galatia mite (ethenic Galatian) gamsung ahipoi. Galatia lekhatot'a ahin Solchah lekhabu'a ahin khat chan jong Northern Galatia'a khopi khat cha amin phah lou jehchun, tahsan chu hiche Galatia mite henga Paul'in lekha athot hi Southern Galatia'a houbung ho hidinga tahsan ahi.

LEKHATHOT KITHOTLO NA JEH

Paul'in hiche lekhatot hi Juda thuhil lhemho NT thuhil sunggil – “tahsan vanga chonphatchan” gelneo le ima'a seplou ho kimaito pi nadinga asut ahi. Amaho chu Jerusalem Council (Acts. 15:13-29) imacha gellouvin anothhap'un, thuhil tijat umtah “gentile khat chu Christian akiso theina dinga amasa'a Juda mi kiso masading” chuleh “Mose dan jouse ajui ding angaije” (1:7; 4:17,21; 5:2-12; 6:12-13) tin ahilun ahi. Galatia miten hitobang thuhil dihlo asan baijuchu agelle Paul alungdongin, atijat pi'in (1:6) hijeh'a chu Paul'in hiche lekhatot hi – “Tahsan vanga chonphat kichang ahi” ti ahuhbitna (defence) nadinga athot ahin; chuleh thuhil dih hi ipom louleh itobang gotna hunglung dingham hilhetna'a athot ahi.

GALATIA'A PAUL GOSPEL DOUDALHO

Galatia'a boina semho gahkhol chet hi hahsa tah ahi. Koiham khatnin Galatia houbung sunga boina (confusion) aseplutnin ahileh Galatia houbung chu asuboi lseh jeng'e (1:7; 5:10). Paul'in hitobang bolpa chu amin aphapoh poi. Aman amaho chu 'mikhattou' 'koihamkhat' ti'in bou aseije (6:3). Paul'in hitobang boina chu apama kon ham asunga kon ham jong aseipon, ahin athuhilu chu neo khat aseije. Hichu

1. Galatia gentile te chu achep atanu angaije atiuve (5:3; 6:12).
2. Amahon Pathen houna dinga special calendar – nikho, lha, phatbih le kum alhendoh dingun atilkhovun ahi (4:10).
3. Amahon kipana thupha chom ahillui (1:9).

Ahin Galatia sunga boina semho gahhet thei leh ginmothei ho chu:

1. JUDAIZER: Amahon polam muthei dinga kitepna melchihna nei angaije atiuvin; calendar leh cheptan (4:10) akhoh sah'un ahi. Calendar (nikho) chungchang'a Judate'a toh kitoh 'Nikho' chu 'Sabbath' toh kijui; 'Lha' chu Judaten 'lhathah' leh 'lhaman' ajuidanu; 'season (Phatbih/phatchin)' chu Judate kut/kumhei'; chuleh 'Kum' chu 'Sabbath kum' (cf. 5:3) toh kijuija anit dingun ahilui. Achutilou leh Pathen mite tahtah hithei louding ahieuve atiuve.

2. GENTILE JUDAIZER: Mi lhomcha pom danin Galatian Judaizerho chu Juda Christian jong hilou pamlam'a kon jong hilou, Galatia Houbung sunga gentile mi OT hoitah'a akhol gil jeh'uva Pathen toh kitep nam mite hitheina dinga cheptan angaije ti'a kholdoh'a seiho ahi atiuve.

3. THE TWO FRONT: Kimkhat geldanin Galatia'a hi Paul'in group ni akimaito pi ahi atiuve. Akhatna'a Judaizer ho ahin, alangkhatna ho chu Antinomian⁵ ahiloule libertine⁶ (5:13-6:10) ho ahiuve.

4. GNOSTIC: Gnostic kiti thucheng hi Greek pao "*gnosis*" akon kiladoh ahin, hichu "knowledge/hetna" tina ahi. Hijehchun Gnosticism kiti chu 'hetna jeh'a sochatna/salvation by knowledge' tina ahi. Gnostic tahsan jouse hin thilni tahsan (cosmological dualism) hichu: tahsa (thil muthei, khoikhah thei, matter) leh lhagao (spirit) tahsanna aneicheh'ui. Gnostic masaho chun Docetic Christology aneijun hichu: Christa chu lhagao thengsel'in amu'ugin leisetna naosena ahungpen chu apom pouve. Amaho "Muthei/khoikhah thei chu aphilou ahin, lhagao vang apha ahi (Matter is evil, spirit is good)" ti atahsanun, tahsa le lhagao kihal theilou ahi atiu ahi. Hijehchun amahon "Jesu chu tahsa mihing ahungkiso'a ahileh amachu Pathen hitheilou ding ahin, huhhingpu chu lhagaova aumjing ngai ahi" atiuva Christa mihem ahina hi atahsan louvu ahi.

GALATIA LEKHATHOT SUNGA THUPI PHABEP HO

1. **CHONPHAT CHAN:** Themchan ahilouleh chonphat chan kiti hi Greek paova kon kilason hichu 'chonpha/adih ahi ti'a pom' tina ahi. NT sunga chonphatchan hi 39 vei akimun, hiche lah'a chun 29 hi Paul lekhatthot ho'a kon ahi. Hiche'a kona hetthei chu Paul hi NT sunho lah'a huhhing/sochatna dinga chonphat chan hi athupipen ahi ti'a haseipen ahi.

Chonphat chan hi thutan na ina (court) kimang, 'thutan pan chonse/themmo chang khat chu chonpha ahi ti'a aphondoh' thuchenga kon ahi. Paul'in chonphat chan atiteng "Pathen'in michonse khat achonsetna asuh manga chonpha'a asim" atina ahi. Hichu Jesu lungset jeh leh tansan vang ahi. Hijeh chun:

- a. Chonphat chan hi Pa Pathen natoh ahi. Chonphat channa chu Pathen ahi. Michonse khat chu anatoh vanga hilou atahsan vanga chonpha'a asim ahi.
- b. Chonphat chan nahi chapa Pathen, Jesu Christa akon ahi.
 - i. Chonphat ichan theina dinguva Christa thi'a ahi.
 - ii. Chonphat ichan theina dinguva Christa thoukit ahi.
 - iii. Michonpha pa Jesu Christa lhatdamna natoh jala mijouse dinga mohseh thilpeh chonphat chan chu kichang ahi.
 - iv. Athun chonphat eichannu ahi.
- c. Chonphat chan hi isunguva cheng Lhagaotheng jal ahi. Isunguva cheng Lhagao theng chun chonphat eichan sah'u ahi.
- d. Chonphatchan hi tahsan vang ahi. Hichu Jesu Christa lhatdamna natoh tahsan vanga bou ahi.

⁵ Lungset le Tahsan vanga huhhing chang ihiuvin, Danthu jui angai tapoi ti tahsanho ahiuve. Se le pha chung changa danthu (Moral law) to kisaija Antinomian thuhil chu: polama kona khatnin eisol jeh'a danthu chu nun ding hilouva tahsan vanga isunga kona juidinga pha'a gelhah'a kona boljoh ding ti ahi.

⁶ Danthu noiya um hilouva lungsetna noiya um ihiuve tia hilho ahiuve. Amahon Rom. 6:14 ahilchen khel'un, lungsetna noiya um ihi taovin, chonsetnin ichunguva thu aneilou ahitai atiuve. Koiman Pathen'in atep dan (standard) chu ajui bukim jou louhel ding ahi jeh'a lungsetna eichanu ahin, lungset eichan jing dinga ahi atiuve. Chule Pathen'in idei dei boltheina dinga chamllhatna eipeh'u ahi atiuve.

2. DAN/Law (*Galatia le Rome vetkah*): Danthu chu ipi jeh'a kipeham? Rome 7:12 na'a "Danthu athenge, thupeh jong athenge, adih l'eh jeng'e!" ati. Ahin danthu hi mihem khat chonphat chan nadinga kipe hilouvin:

- a. Danthu chu mihemte damtheina dinguleh huhbitna aum theina dingua ahi (Rom. 8:1-7)
- b. Danthu chu Pathen le alunggel kipon dohna dinga kipe ahi (Rom. 12:16,22)
- c. Danthu chun mihem chonsetna vah'a ahin pohdoh'a (Rom. 5:13), chuteng mihemten alung aheijuva Pathen lungsetna'a akingai theina dingua hung kipe ahi (Rom. 3:20,23).
- d. Tahsan te hinkho'a lamhil ding (Rom. 8:3ff; 7:6; I Cor. 9:21) le eipui dingua kipe ahi (Gal. 3:24,25)

Judate dan OT 'a chonphatna dan chun thuman (obedience) angeh'e. Koi hileh danthu manga leh juija chu dan dungjuja chonphat chang ding ahi (Rom. 2:10). Ahin Paul'in khaotah'in koimacha danthu/natoh pha jala chonphat chang jou louhel ding ahi ati (Rom. 3:20). Aman danthu'in hinna ape theipon, (Rom. 3:21), hijeh chun danthu juiding kitih Pathen lama lungthim dihtah neiding (Rom. 2:25-29) atina ahi ati.

3. CHAMLHAT TAH'A CHON (Conduct in freedom 5:13-26): Paul'in Christian kiloi khomna sunga chamhlatna phondoh ding angaikhoh dan ahille. Aman bol louding leh bolding, juiding leh juilouding phabep apen: hicheho chu Paul khanglaija dinga umchan kihilna (ethical teaching) ahin, adih lou, bollouding'a kiseiho chu 'tahsa lam natoh' atin, hicheng 15 ho chu hop 4 in akikhene.

- a. Thum ho chu jonthan (sexual) to kisai ahi: Jonthanhoi, thenlou leh huh.
- b. Ni chu hou dihluo toh kisai ahi: Milim hou leh doichoi.
- c. Get ho chu mihem le mihem kah'a kiguijopna toh kisai ahi: Kidou, kinah kinel, kimitthip, lungnan, luitumsem, kilangkhin, kibungkhen leh kithangset
- d. Ni hin eima tahsa chung ahi: Jukham leh eltol golnop bol.

Paul'in adih le chihna lam pang jong aseijin, hiche ho chu "Ga", natoh vang hilou Pathen lhagao isunga achen kon hung gadoh – Lhagao ga ahi ati. Hiche hi Christian khatnin khat cheh neiding tina hilouvin, Christian jouse sunga kon hiche ga hohi hung ga doh ding ahi.

- a. Ngailut – Hiche chungchanga hi Paul'in 5:6; 13-14'a jong aseitan, danthu jouse sanga jong chungnungjo le danthu bukipna chu ngailutna ahi ati.
- b. Kipa – Christa'a mihem thah ihi jalla kipa kiseina, itih lai hijongleh kipa (Phil. 4:4) aseina ahi.
- c. Cham lungmon – Pathen angungle Pathen lim noiya uma kon leh ami te lah'a um'a kon kinei lungmona ahi. Hiche hi khatnin alungsunga Pathen toh kiguijopna dihtah ane kicheh tah'a ahetna kon anei ahi.
- d. Thohhat – Min e-ilothen hijongleh pang kut kut'a thoh tun tun jeng, ahilouleh sottah genthei thoh jou tina ahi.
- e. Mihepi – Midang gelkhoh, Jesu Christan atahsan te dinga agelkhoh banga midang khohsah, lungset tah leh hepi tah'a midang khohsah.
- f. Phat – Tahsa lam le lhagao lamma midang khokhel la mihepi, thilphabol.
- g. Tahsan um – mihem toh Pathen kikh ani'a tahsan um; mi sonthei leh nganse thei, kitah tah hiding
- h. Lungneng – Eisangin midang aphachomjoi, aboltheijoi ti'a gellhah'a kineosah, aneopenna kigel'a minoiya kun ngapna.

i. Amachang kitim – Tahsa ngaichatna’ a kitim, nehle don, lungthim apumpi’ a kitim jouva mijouse toh kicham della umthei.

4. CROSS THANEIDAN/THILBOLTHEIDAN

- a. Chonsetna konna huhdohna (1:4; 2:21; 3:22).
- b. Danthu’ a sapset channa’ a kon huhdohna (3:13).
- c. Eima hinkho’ a konna huhdohna (2:20; 5:24).
- d. Vannoiya kon huhdohna – 6:14).
- e. Penthah na (4:4-7).
- f. Lhagaotheng channa (3:14).
- g. Lhagao ga neina ding (5:22-25).

OUTLINE

1. Introduction – 1:1-9
2. Solchah Paul chamlhatna – 1:10-2:21
 - a. Mihem’ a kon hilou kipana thupha – 1:10-17
 - b. Paul chamlhatna – 1:18-2:10
 - c. Paul kipana thupha kipatep – 2:11-21
3. Galatia mite henga chamlhatna’ a ahuhung kilekit na dinguva temna – 3:1-4:31
 - a. Galatia mite thilto’ a kon temna – 3:1-5
 - b. Pathen thu’ a kon temna – 3:6-14
 - c. Danthu ahatmo chungchanga kon temna – 3:15-25
 - d. Pathen chate dih tah ho henga temna – 3:26-4:11
 - e. Loile gol hinna’ a temna – 4:12-31
4. Christa’ a chamlhat ho kin – 5:1-6:10
 - a. Longlouva chamlhat tah’ a hindung – 5:1-6:10
 - b. Chamlhattah’ a natoh – 6:1-10
5. Conclusion – 6:11-18

EPHISUS MITE HENGA PAUL LEKHATHOT

ATHOT PHAT LEH ATHOT HO

Paul’ in hiche lekhatthot hi Rome songkul’ a aum laija ajih ahi (c. AD 60-62). Hiche lekhatthot translation masa ho’ a Ephesus hi ajao hih’ in, koimacha houbung thu leh koima cha min akiphah lou jalchun Scholar tamtah geldanin Ephesus lekhatthot hi Asia Minor gamsunga houbung ho lah’ a kitol lele dinga amasa penna Ephesus’ a kithot hidin agingmo un ahi. Hiche houbung ho chu: Ephesus, Smyrna, Pergamos, Thyratira, Sardia ahi.

EPHISUS KHOPI

Ephesus khopi hi Aegean twipi solam Cayster vadung kam/bul’ a um Asia minor lhumlam dinga khopi thupi pen ahi. Kivaihomna lam, kiveina lam, houthu lama dinga mun lailung pen ahi. Ephesus’ in amin thanpi tah chu Artemis/Diana temple ahin, masanglai vannoi thil lamdang sagi

lah'a khat anahi. Kiveina (commercial), chihna/hetna (education), kivaihomna (Politics) lama asan jeh' chun Egypt gama Alexandria, Antioch of Pisidia to kibang leuva gel ahi.

EPHISUS HOUBUNG:

Kipana thupha hi Ephesus'a Priscilla le Aquila in ahin pohlut masat penlhon ahi (Acts. 18:26). Amanihi Paul'in 2nd Missionary akholjin laiija chukom muna umdinga adalah lhon ahi (Acts. 18:18,19). Priscilla leh Aquila'in aphudoh lhon houbung chu Paul'in a 3rd Missionary kholjin laiija aphutdetna (Acts. 19) amatah hilai muna chu Pastor'a kumthum panga ahi. Paul'in adalah jouvin Timothy hikom munna chun kumkhat leh akeh bang mijou (influence) mama thuhil dihluu (Hymenaeus leh Alexander) houbung sunga upa hidinga ginmo (I Tim. 1:3,20) teni kimaito pi dingin adalha'e.

Hitobangho jeh chun Ephesus houbunga chun boina alhungin: angailouva tantih neilouva khanggui thu kinei nan adipmin (I Tim. 1:3), kichen akhamun, nehding phabep a kon kikangse dingin ahilun (I Tim.4:3), Pathen thu hechen louvin, athuhilu adih tah ahi tin atuhchah un (I Tim.1:7) tahsan lam le Pathen lamma khantou tah sangin houbung sunga kinelna alhutnun (I Tim.1:3) ahi

EPHISUS LEKHATHOT SUNGA THUPI PHABEP:

1. **GOT MASAH** (1:5): Gotmasah (predestination/predestinate) kiti thucheng hi Greek pao *Proorisas* akon kilason, hichu aphot masanga kimmelchih (mark out beforehand), ahilouleh kiseddoh masa/kilhengdoh masa (fore-ordain) tina ahi. Hichun Pathen'in amite'a dinga atohgon hi tonsot'a pat ahitai atina ahi. Atohgon chu "Jesu Christa vanga alamcha'a agot masah" ahi.

Cha le pa banga mihem hi Pathen toh kiloikhom dinga asem ahi (Gen. 1:26; Acts. 17:28). Ahin chonset jeh'in hichu suhmangin aumtai. Ahivangin lungset jal leh Christa vangin hiche cha hina chu avella kiledoh sah'in aum kitne (Jn. 1:12). Lamcha kivah dinmun chan (adopted position) hi chanvou (right) vanga hilouvin lungset vang ahi. Hijehchun gotmasat/lhendoh masat kiti thuhil hi suhdet ahi. Hinlah hichu namkhat'a dinga bou gon ahipoi. Pathen'in mijouse hi alamcha hidinga agot masah ahi; ahin agotsa le akou/alhen hisoh kei jongleh akouna sangho chungu bou guilhung ahi. Pathen'in koima tonsot thina chang dingin ago masapoi. Pathen'in vannoi bul kiphu doh masanga patna angunga nolna bei ihi theina dinguva eina gotsao ahi (1:4).

2. **SUHCHAM/KICHAMSAH KIT**(Reconciliation). Eph. 2:16 na'ah Paul'in Christa thi hi Judate ahivuva gentile te ahivun Pathen toh kicham kitna ding ahi ati. Hiche hin iti danna mihem khat chu Christa natoh jala Pathen angunga adih hithei ding ham ahille. Kichamsah kit ti thucheng hi chonphat chan banga Paul'a dinga huhhing channa dinga thu chang thupi tah khat ahi.

Paul'in Christa natoh hi kicham kitna ding ahi tin alekhathot li ah aseije (Rom. 5:10; 2 Cor. 5:18; Col. 1:20; Eph. 1:10; 2:16). Hicheng Bible chang li ho'a kon hin Paul'in reconciliation hi ipi lamma amanham veu hite:

a. Mihem in Pathen toh kicham kitna ding angaicha'ui. Ajeh chu mihem chonsetna hin Pathen toh akah'uva kikhena/kidouna (alienation) alhut ahitai.

b. Pathen amatah in kicham kitna natoh hi apohdoh ahi.

c. Christa Cross chung a thi hin hiche Pathen'in kicham nadinga anato hi asuh chamkim ahi. Christa thisan vang leh athi vanga Pathen'in mihem tetoh kiguijopna aphudoh kit ahi.

d. Hiche in atop/avetsah thupi pen chu mihem le Pathen kikh'a kiguijopna sem phat kit ding ahi. Christa vangin Judate le Gentilete chu pumkhat'a sem ahiuve. Chugoh hilouvin mihemte (gentile le Judate) kah jenga jong atahsanho lah'a kichamna ahin lhutnin ahi.

Ephesus 1-3 sunga hin Pathen thu (Theology) NT Doctrine thu asejin, chuleh achaina bung 3 hohin nato, Christante iti chon ding ham aseije. Hiche lekhatot hi alhangpi'in tilkhouna leh hilchahna ahi. Paul'in Ephesus houbung mite chu Jesu Christa'a kon vangbohna achahou agel doh sah'in, hiche vangbohna ho chung akipa diugoh hilouva achanu toh kitoh'a achon nadingun atil khouvin ahi. Tahsan chate chu Satan'in avangboh chahou chu amaho boltheina le amaho'a kona ahi ti'a alhep thei jeh'a Paul'in khoh tah'a achaina lama Lhagao/Pathen galvon: Pathen thu vang leh Lhagao thenga'a kon (6:10-17) galvon chu hoitah'a akivon jing dinguvun ahetsah'in; kiging jingle taojinga aum dinguvun atilkhove (6:18).

3. AKISELGUH / AKI'IM / AKIPHONG DOHLOU: Hiche thuchenghi Ephesus lekhatuotna dinga thupi khat ahi. Kipana thupha jalla houbung hi (Judate le gentile te jaona) Christa toh goulokhom, tahsaphe khat, kitepna thutep na changkhom ahiuvun (3:5-6), hiche thuguh hi Old Testament mithengho henga ana ki'im/kiselguh, anakihetsah lou, ana kiphong dohlou ahi (3:6) atina ahi. Jesu Christa tahsan jouse chu Pakai maija kibang soh keiju ahin, alenggam ma dinga mihina (citizen) neicheh ahiuvun, hichu tulai khanga tahsan jousen aneicheh'u ahi. Paul'in houbung chu Christa mou ahin, akiphongdoh lou tu'a kiphongdoh danin jong aseije (5:32 cf. Rev. 21:9).

4. Tahsan te ahaodan (riches) le vangbohna chamkim (fullness of blessing) achah danu (1:7; 3:8; 3:16; 3:19; 4:13; 5:18); Christa jalla haona (1:2,6,7; 2:7; 1:5,9,12,14,18,19; 6:10; 2:4; 2:10; 3:16; 5:3; 6:11,13). Hao thucheng hi 5 vei, lungset hi 12 vei, loupina 8 vei, Dim (filled) 6 vei, Christa'ah/ama'ah (in Christa/in Him) hi 12 tobang akimun; hiche hojong hi Ephesus lekhatot thupi ahi cheh'ui.

5. TAHSAN CHATE CHRISTA'A VANGBOH ACHAN NAO (1:3-14)

- a. Lhagao phattheina tin tanga vangboh na (1:3)
- b. Atheng dinga kilhengdoh (1:4)
- c. Cha hidinga got masah (1:5)
- d. Pathen'a dinga santhei/lahthei (1:6)
- e. Athisan vanga chohdoh (1:7)
- f. Chihna leh lunggel themna eipeh'u (1:8)
- g. Lhagao thenga mahor einamu (1:13-14)

6. TAHSAN CHATE KIMAN CHAH DING DAN

- a. Numei/inneipi mopohna (5:22-24)
- b. Pasal/inneipu mopohna (5:25-33)
- c. Chapang/chateho mopohna (6:1-3)
- d. Paten chate chung a mopohnao (6:4)
- e. Soh mopohna (6:5-8)

- f. Pu (master) mopohna (6:9)

OUTLINE

1. DOCTRINAL (Thuhilna lampang) Christian te kikou (1-3)
 - a. Salam (salutation) 1:1,2
 - b. Pathen huhhingna jeh'a thangvah 1:3-14
 - c. Ephesus ten amuchet/hetdoh (enlightened) na dinga taona 1:15-23
 - d. Ephesus te sochatna: Pathen milungset huhhingna natoh 2:1-10
 - e. Judate leh gentile te kipumkhat 2:11-22
 - f. Paul gentile te henga solchah 3:1-13
 - g. Ephesus te lhagao lamma ahatna dinguva taona 3:14-21
2. NATOH (Practical) Christian hinkho (4-6)
 - a. Houbung kipun khom leh khantou 4:1-16
 - b. Polama muthei dinga Christian te hinkho umding dol 4:17-6:20
 - c. Thukhum khana 6:21-24

PHILIPPI MITE HENGA PAUL LEKHATHOT

PHILIPPI KHOPI

Akimvela twisam put tampi aumjeh hin Philippi khopi min dihtah chu Krenides (the little fountain) kiti ahi. Aminthah Philippi (Philip khopi) hi Mecedonia mi Philip II (Alexander the Great pa)'a kona kiminvu ahi. Akimvela sana khuh (gold mines) atam jeh'in avelel in Philip'in agamsung chu kumjabih 4 laija ana lo ahi. 2nd century lai jin Philippi chu Rome lenggamsung Mecedonia gamkai ja ajao tha tai. 42 BC'a Antony le Octavian lojin Brutus le Cassius Philippi gal kikat munna ajo'u toh lhonin Philippi chu Roman Colony ahitan (Acts. 16:12), Rome sepai pension tampi achengun ahi. Roman khopi ahito lhonin Philippi khopi chun Italy khopi ho bangin chanvou aneiju, Roman dan amangun, kai phabep'a kon lha'ong ahiuvin, Rome gammi hina neiho chenna ahi (Acts. 16:21). Amahon Latin pao amangun, Rome chondan apodoh'un, Italy khopi ho bangin akhopi'u chu ajemun ahi. Philippi mite chu hitobang Roman chanvou ho jeh chuleh kivai homna jeh chun akilet sah lseh jengun ahi. Hijeh hin Paul'in Philippi Christiane chu vangam mite ihuive (3:20) ati hi akilom lseh jengin ahi. Ajeh chu Philippi mite chu Roman citizenship ahiu chu kiletsah lseh jengu ahin (Acts. 16:21) Rome gammi hina neisanga Vangam mi mihina nei hi achungnung joi ti'a asej ahi.

PHILIPPI HOUBUNG

Philippi houbung hi Paul'in Missionary kholjin ani veina'a aphudoh ahi. Hiche hi Europe gamsunga dinga ahoubung phudoh masa pen ahi (Acts. 16:12-40). Philippi'a hin Juda mi lhomcha bou achenge. Mi alhom behseh jeh uvin kikhopna in (synagogue) jong anei thei pouvin (Insung mipa cheh 10 lhinna muna bou Synagogue kiphutdoh thei ahi); Numei phabep chu khopi pamlam, Gangites luipamma taokhom dingin akikhom ji'ui (Acts. 16:13). Paul'in hiche holah'a chu Pathen thu aseija, Lydia ponsandup joh numei nu chu apengthah'a (Acts. 16:14-16), chuleh tahsan ho chu amanu in'a kikhomji hidinguva ginchat ahi.

LEKHATHOT KITHOTLONA JEH

Paul'in Philippi houbung hi 3rd Missionary journey lai jin nivei: akipat na lang (2 Cor. 8:1-5) leh achaina langa (Acts. 20:6) agavilin ahi. Aman Rome'a songkul atan lai ja Philippi'a kon ave dinga hung kisol (thalheng) ho anamu'in ahi. Philippi houbung ho hin Paul achesa phatlai ja nasatah'a anakithopiu ahin (4:15,16), Jerusalem genthei kithopina ding in jong hongphal tah'in ape'un (2 cor. 8:1-4), Songkul'a aum ahet hetnun amahon Paul akithopi kitnun ahi (4:10). Amahon akithopinao (sum) chu ahahsatna'a ajenle dinga ahinsolu Epaphroditus khutna ahin thotnun ahi. Ahin Paul jenle dinga ahinsolu Ephaphroditus chu Paul koma aumpetnin adammon, athilo dehchetne (2:26,27). Adam doh jouva Paul'in Epaphroditus alesol nom toh lhonna (2:25,26) hiche lekhat hot hi ama chu apohsah ahi.

NATURE OF PHILIPPIANS (Philippi lekhat hot umdol)

1. **Nolna bei lekhat ahidan:** Corinthians le Galatians'a banga Paul'in asolchah hina ahuhbit (defence) angaipoi. Philippite chu Paul'a ding in mon aum'un, akitha'un, tahsan thu khatvei ajah'u jong chu atuh det jingun ahi. Amahon Paul angailut danu chu angaichat ding lai jengin jong akithopi ding le ajen ding ahin solpeh nalai jui (4:10-18). Chuleh houbung sukeh theihel ding thuhil thu'a kiboina jong aumpoi. Ahin neo neo boina umho chu: kitomona le changval ding gel (2:3,4; 4:3), Judaizer thuhil (3:1-3), chamkimna (3:12-14) hohi ahi.

2. **Lekhat hot hi ngailutnan adimme.** Paul'in amaho ding in kipah tah'in ataovin, amaho angaina'in ahi. Paul'in amaho aha ngailut dehsetna chu Epaphroditus ahenguva asolkita konin akimun ahi (2:25-30), chuleh Timothy amaho henga asol got na'a photchit ahi (2:19-23). Amahon ngailutna neitah'a ahin thil thot'u chun Paul ding in kipa thanopna ahin lhutne (4:10-18). Kipa ti thucheng hi lekhat hot sunga 16 vei tobang akimun ahi.

3. **Christiante kipunkhom theina dinga Pastor lekhat hot:** Houbung sunga kihetthem louna le kitomona neocha ahung lhungin, hichu akhan jing leh mitam tah pullha ding ahin, hijeh chun hitobang kihetthem louna chu jopmat/thoibit ahi theina dinga Paul'in: Lhagao khat na din ding (2:27), Kikhen telna lungthim jouse koidoh ding (2:1-4), phunchel na leh baotam na jouse paimang ding (2:14-15), chuleh Christa'a um lungthim/lunggel chu neiding (2:5-8) in atilkhovin ahi.

PHILIPPI SUNGA THUCHENG LE LUNGGEL THUPI HO:

1. **Christa:** Philippi lekhat hot hi Christa thuchenga adimsetnin ahi. Christa'a kiti thucheng hi 37 vei akimui. Kipana thupha sunga hin Christa athupi pennin alailung pen ahi aphochen leh'in ahi.

2. **Kipa:** Lekhat hot chom cha sunga hin kipa (Joy/rejoice) kiti thucheng hi 16 vei jen akimun ahi (1:4,18,25; 2:2,17,18,28,29,31; 4:1,4,10...). Christianten (lhagaova) kipah tah'a hinkho manjing ding ahidan akimui.

3. **Lunggel dihlam:** Hiche hi Greek thucheng "*Phronom*" mi dang phatchom na dinga lungthim ma natoh nomna – tina ahin, 10 vei akimui (1:7; 2:2,5; 3:15,19; 4:2,10). Paul'in Philippi Christiante chu alungthimu adih lam – Pathen le ahuhhing pu'u loupina ding gel na'a apeh lut dingun adeijin ahi.

4. **Kiloikhomna**: Greek preposition “*sun*” hin gilpentah’a kiloikhom, kiguijopna nei (closest fellowship/communion) atina ahin; hiche ho chu:

- a. Lungsetna kachankhompi (*sunkoinonos*) Christa lungsetna changkhom, athoh na’a thoh khom tina ahi (1:7; 4:14).
- b. Tongkhom/galkonkhom (*sunathleo*) kipana thupha amachal theina dingle Christa dinga pangkhom’a galsat khom (1:7; 4:14).
- c. Lhagao khat/pankhom (*sunpsuchos*) Christa’a dinga lungthim kithakhat (2:1).
- d. Kipapi/Kipah khom (*sunchairo*) Christa’a kipahkhom (2:17,18).
- e. Tongkhom (*sunergos*) Christa na tongkhom (2:25,4:3).
- f. Sepai pangkhom (*sunstratiotes*) Christa’a galsatkhom (2:25).
- g. Kitho khompi (*sunlambano*) Christa pohgih domkhom (4:3).
- h. Namkol jon pokhom (*sudzugos*) Christa namkol pokhom (4:3).
- i. Umchan khat thokhom (*sunmimetai* - 3:17).

CHRISTIAN HINKHO MELCHIHN

Christian hinkho melchihna chu Christian kipa hi ahi. Hichu:

- 1. Christiane taona’a kipana aume (1:4)
- 2. Christa ipohjal teng kipana aume (1:18)
- 3. Tahsan na’a kipana aume (1:25)
- 4. Christian te akiloi khom imu teng kipana aume (2:20)
- 5. Christa’a dinga ithoh gim teng kipana aume (2:17)
- 6. Ingailut ho chungthu ijah teng kipana aume (2:28)
- 7. Christian ten phat ibol teng kipana aume (2:29)
- 8. Christa miho ding chun kipa aume (3:1; 4:1)
- 9. Christa’a dinga lhagao huhhingho dingin kipana aume (4:1)
- 10. Thilpeh’a kipana aume (4:10)

KIPANA THUPHA DOUDAL HO CHU (3:1-3)

- 1. Uichaho: Jesu amatah’in gentile/Pathen hephalou ho chu uicha anati.
- 2. Achon gilou: alunggel, anatoh leh atohdoh cheng gitlouna ngenho.
- 3. Kitumsah ho: Hichehin “satlhah” ahilouleh “Mallhah” ahilouleh “satkol (cutting around)” aseina ahin, hitobang miho hi amaho leh amaho kipailha kitumsah Proselyte Jews hiding ahi.

PAUL CHANVOU 3:4-7

- 1. Pathen toh kitepna nei nam/chilhah ahi (ni 8 ni’a chep kitan).
- 2. Anam mi hina (Israel chi): Mikhat chu achep kitan jongleh chidang namdang Juda mi kiso hithei ahi. Ahin Paul vang ahipoi. Israel dihtah ni 8 ni’a chep kitan ahi.
- 3. Ainsung (Benjamin phung mi) son’umtah nam, Israel chi dih tah chilhah.

4. Atomngai/gut nalam pang (Hebrew lah'a Hebrew) Midang hilouvin Hebrew chondan le pao hoitah'a he le jui.

5. Pathen thu hetna lampanga atuhdet dan (Orthodox – Pharisee) Hougut pen penho loi.

6. Hougut (religious zeal) Houbung sugenthei – atahsan khat dinpi'a thipi ngamleo leh midang jo jong som teitei mi.

7. Chonphatna lam'a nolna bei ahi – danthu juina lama danthun anol lou, dan masanga nolnabei mi ahi.

OUTLINE

1. Lemna (greetings) (1:1-11)
2. Paul hinkho man dol (1:12-26)
3. Paul'in tilkhouna anei (1:27-2:18)
4. Paul kiloi piho (2:12-30)
5. Paul'in gihna thu aseï (3:1-4:1)
6. Paul thumop (4:2-9)
7. Kipa thusei (4:10-20)
8. Lhahna thusei (Conclusion) – (4:21-23)

COLOSSIA MITE HENGA PAUL LEKHATHOT

HOILAIJA KON NA ITIH LAIJA ATHOT HAM?

Colossia mite henga lekhatot hi Paul'in Rome songkul atan laitah'a (AD 60-62) athot ahi. Hijeh hin Colossia lekhatot hi, Ephesus, Philippi leh Philimon lekhatot ho ton Prison letter (songkul lekhatot) akiti.

COLOSSIA KHOPI

Asia gamkai (tua Turkey) munna um Roman lenggam Phrygia sunga um khopi khat ahi. Colesse hi Ephesus'a kon mile 100 vel'a gamlha solama um ahi. Colesse umna gamkai hi Rev. 1-3 sunga houbung 7 kisei ho umna vel lah ahi. Colesse'a hi atamjo gentile mingen um ahi vangin Antiochus the Great (223-187 BC) khang'a pat'a Judate jong tamtah ana chengu ahitai.

COLOSSIA HOUBUNG

Colossia houbung hi Paul's 3rd missionary journey laija kiphutdoh ahin (Acts. 19); hinla Paul phudoh ahipoi. Ajehchu Paul'in Colossia mun agapha khapoi (2:1). Epaphras phudoh joh ahi (1:5-7). Epaphras hi Paul'in Ephesus'a athusei laija hung pengthah kha'a, chujouva in lam akile nunga Colossia houbung hi aphudoh hidinga tahsan ahi.

LEKHATHOT KIJIH LONA JEH

Houbung akiphudoh kum phabep nungin Colossia houbung sunga thuhil dihlu: Gnosticism⁷ ti'a hung kihe hon boina ahunglhut nun; chugoh hilouvin Juda thuhil (Judaizer): sochatna dinga cheptan na OT thuhil ho juinding angaije tiho; munthip'a changa Pathen hou (asceticism) angaije ti'a hil ho; ahung lutnun, chule Colossia houbung mihon jong ahin pompan taove. Achung chonna Christianten vantil houding le hinkho'a thilkidang to ding (mystical experience) angaije atiuvin ahileh Epaphras chun hiche thuhil dihlu ho alung khampi behset jalla Colossia'a pat Paul songkul atan namun Rome gei hunga (4:12,13), Paul thumop ahung lah ahi.

COLOSSIA LEKHATHOT SUNGA THUHIL/DOCTRINE KIMUHO

Colossia ahin thuhil thupi Theology lamto kisai tamtah aume. Christa Pathen ahina (1:15-20; 2:2-10), Kichamkitna/suhchamna (1:21-23), lhatdohna/redemption (1:13,14; 2:13,14; 3:9-11), Lhenchom/election (3:12), ngaidamna (3:13) chuleh houbung umdol (1:18,24,25; 2:19; 3:11,15) tiho ajaove.

CHRISTA ACHUNGNUNG NA SAGI HO

1. Christa chu mulou Pathen kiphondoh na – mutheija Pathen lima um, muthei lou Pathen thalheng ahi (1:15).
2. Thilsem jouse lah'a apeng masapen ahi (1:16).
3. Ama'a chu ijakai muthei le muthei lou jouse kistem ahi (1:16).
4. Ama thiljouse masanga ana umjing sa ahi (1:17).
5. Ama'a chu thil jouse um ahi (1:17).
6. Ama houbung luchang ahi (1:18).
7. Ama'a chu chamkimna tin cheng um ahi (1:19).

KIPANA THUPHA MANLUT DAN (1:2-28)

1. Kipana uhupha hi Pathen kipa na thupha ahi.
2. Kipana thupha hi thutah ahi.
3. Kipana thupha hi vannoi pumpi hopsoh ahi.
4. Kipana thupha hi ganei ahi.
5. Kipana thupha'in lungsetna thu aseije.
6. Kipana thupha hi mihem khat'a kon mihem khat kipesona ahi.

COLOSSIA HOUBUNG BOINA

⁷ Pathen hi apha ahin, tahsa hi ase ahi ti tahsanho. Amahon Jesu Christa jong hi mihema ahungpenna ahileh ase/aboh (evil) hiding, adang kiseiho banga Pathen'a konna hung maimai Pathen sanga nemjo ahi atiuve. Amahon Christa Pathen ahina anelkalun, Gnosticism hi *Gnosis* (hetna/knowledge) 'a kon kiladoh ahito lhonin, amahon sochatna dinga Pathen thuguh chungnung tah'a het ngai ahi atiuve.

1. Tuhil dihlou **Christa chungnun na** chou/nelkal ho ahiuve. Hijeh hin Paul lekhatot danga hitobang loma Christa abulhin naleh achamkimna kiseina aumpoi. Christa chu muthei lou Pathen lim ahi. Ama'a chun chamkim na um/cheng ahi (1;15,19). Ama'a chu chihna le hetna gou jouse kisel la ahi (2:2). Ama'a chu Pathen hina chamkim chenga ahi (2:9), tin ahil chene.

Christan thiljouse semna'a pan alah atah langin, thiljouse ama vanga chuleh ama dinga, chuleh ama'a chu thiljouse um ahi ati (1:16,17). Christa chu Pathen'in ijakai asemna dinga amanchah ahi.

Aman Christa mihem dihtah ahina atahlangin: Christan atahsa le aphe, avou tah'a lhatdamna na chu atoh ahi (1:22). Ama chu mihem tahsa le thisan pu'a ahi ti ahilchene.

2. **Van chungchang thu** (astrological element) 'a tuhil dihlou jong ahung lut khan ahi (2:8; 2:20). Paul'in Colossia Christiante apilhin tah sih'uva thil bul lama akinung tolu themmo achanin, adeh'in vanlam'a thilho chungchang'a kihilna tahsan na in ajo (influence) dan'u aseije. Ajechhu masang lai ja chu miching penpen ho jengin jong ahsi/valpa ho'a kon na melchihna (vang um leh umlou ding) amu masanguva imacha abol ngam jilouvu ahin, hibanga chu Colossia'a tuhil dihlou hochun Jesu Christa sanga hicheho tobang lhagaoho joh jui dingleh doh dinga atilkhoh'u ahi.

3. **Lhagao gilou thuneina** (piputna le thaneina/principalities or authorities) atahsan uvin ahi (1:16; 2:10,15). Masang lai tuhil bangin hiche lhagao gilouho chu vanmun tina hui, vangin, go, huipi lah'a aume tin tuhil dih lou hon ahilun, chuleh hiche lhagao gilou thuneina chu Jesu Christa sanga chungnungjo khat'a jo ding angaije ti'a ahilu ahi.

4. Tuhil dihlou ho chun **nikho kispkhen** khat man dingin ahilun ahi (2:16).

5. Chuleh tuhil lhemho chun **munthip'a changa hinkho manga Pathen hou** (ascetic life) ho thu atah langin ahi (2:16). Amahon asaphong hou chu "thamhah'in, tephah'in, khoihah'in" (2:21) tiho ahi. Hichun Christian cham lhatna asu mangin ahi.

OUTLINE

1. Introduction (1:1-23).
2. Tuhil lhem ho toh kimaitona (2:4-3:4).
3. Christian te chonna dih (3:5-4:6).
4. Conclusion (4:7-11).

THESSALONICA MITE HENGA PAUL LEKHATHOT KHATNA

THESSALONICA KHOPI

Thessaloinca hi Roman gamkai Philippi'a kon lhumlam mile 100 na gamlha, Athen sahlam Mecedonia'a dinga khopi ahi. Amasang chun akhopi hi twiput sa (hot spring) atam jeh'in Therma ana kiti ahi. Ahin BC 315 lai jin Cassander (Alexander khelapa) in ajinu Thessalonika geldoh jing na dinga Thessalonica tia ana minvo ahi. Thessalonica hi tuni geijin Salonika tin aumjing nalaije.

THESSALONICA HOUBUNG

Paul 2nd Missionary kholjin laijin Philippi'a konin Thessalonica khopi'a agakhol jinin (AD 50; Acts. 16:1-18:22) ahi. Chukoma chun Synagogue'a ahunglut paijin Judaho kipana thupha ahilin (Acts. 17:1,2) Nazareth Jesu chu Messiah ahi tin athi le atho thu'a konin akihou limpun (Acts. 17:2,3) ahi. Amaho chu Juda mi phabep leh chidang namdang Juda kiso phabep: Jason (Acts. 17:5) Gaius (Acts. 19:29), Aristarchus (Acts. 20:4) leh Segundus (Acts. 20:4) ahiuve.

1st THESSALONICA KITHOT LONA JEH LEH AJIHPHAT

Paul'in chukom'a Sabbath thum tobang thu ahiljouvin (Acts. 17:2) lolhin na lentah anei jin ahi. Ahin hichun Judaho aphin lunghangin boina lentah ahin bolun ahile Paul chukom muna kon ajamdoh lon ahi (Acts. 17:10-20). Ahin Paul'in Timothy le Silas adalhan, ol'in Athen'a akimu kit'ui (Acts. 17:15-16).

Paul'in Athen'a lungkham tah'a aum'a Timothy akimupi nungin Timothy chu alesol kitne (I Thess. 3: 1; 2:5; 17). Timothy ahung kile kitchun Thessalonica houbung ho chu tahsan na'a ading det jingui tin kipana thupha ahin pon ahi (1Thess. 2:14; 3:4-6,9,10). Chuleh amaho chu Paul dinga loupina leh kipana ahiuve (2:20). Ahin alah'uva boina phabep aum dapo. Hijeh'a chu Paul'in kipa thusei na leh aboina hou suhlhapna dinga hiche lekhatot hi athot ahi.

1st Thessalonica kijih lona ding phabep hochu: Houbung ho atil khouna (1:2-10); tuhil dihlo ho Paul mona hechen louva themmo hin chan sahho adonbutna (2:1-12); bolgentheija umho tilkhouna (2:13-16); atahsan nao chung akipana thuphon (2:17-3:13); hinkho theng man athupi dan ahetsah thah na (4:1-8); thase tah'a hinkho man themmo achan (4:4-12); Gaothu sei hetkhel na asuh dih (4:13-5:11); kelngoi hon kah'a nop louna asuh lhap (5:12-15); Christian hinkho man ding dan atil khouna (5:16-22) ahi.

Paul'in 1st Thessalonica hi Timothy Thessalonica'a pat ahunga Corinth'a akimu to kit nunghon le athu hin poh ho hilchet na dinga Corinth'a pat ca. AD 51'a athot ahi.

THESSALONICA HOUBUNG SUNGA BOINA PHABEP HO

1. Second coming chung changa tuhil chun amaho lah'a umchan lamdang tah moh umna aso'in, amahon natos le thildang dang anga'un, natong louvin Jesu hung kitding chu anga tho jengun ahileh Paul'in chuti jeng louva na atos thim dinguva ahil na ahi (I Thess.4:11).

2. Amaho chu Sechond coming masanga anathiho dingin alung khamun ahileh Paul'in Jesu Christa'a anathi ho chu loupina changlel louhel dingu ahi ti'a ahil ahi (I Thess. 4:13-18).

3. Houbung sunga kikhen telna neo neo ahung so dih jeh'a (4:9; 5:13) akipum khatna dinga atilkhoh ahi.

1st THESSALONICA THUPI PHABEP

1. **PAUL'IN ANATOH NA'A AJUI** (Paul's Missionary Method) - Bung 1

- i. Aman Pathen lunglhai louna lam panga mihem alung lhaisah gopoi.
- ii. Aman mihem chu pachat lhem'a jo ding agopoi.
- iii. Aman mihem neiho chung a thangset, deichat abolpoi.

iv. Aman sun le janin na atong jinge.

v. Aman mi atil khou jinge.

2. **HINKHO'A PHAT THUM HO** (Three tense in life) - 1:9,10

i. Past (achesa phat) "Pathen lama kihei" Thessalonica houbungho milim houva kon Pathen lamma akiheiju.

ii. Present (tu'a phat) "Pathen hing na tohding" Thessalonica houbung ho chu milima kon Pathen lam ahung kihei maimai ju hilouvin, ahin lo na penu chu Pathen hing na atoh diu chu ahi.

iii. Future (Ahunglung ding phat) "vanna kon chapa hung ding nga" Tahsan ho chu milim'a kon Pathen lam angat diu, hingjing Pathenna atoh uva, Jesu hung kitna ding chu kinem tah'a anga diu ahi.

3. **AKIPHONGDOH THAH GUP HO** (six new revelation) 4:13-17

i. Eiho Christa'a thi ho chu vangama kon hin kilepui juva thokit na tahsa (resurrection body) chu kipe dingu ahi (v. 4; Jn. 5:28,29; I Cor. 15:20-23; Phil 3:21)

ii. Hiche nikho chule Jesu vanlai jola ahung ding joh ahin, leija ahung ding chu hilou ahi (v. 13-17; 2 Tim. 2:7)

iii. Christa'a ana hing ho chu thilou dingu kikhel joh dingu ahi (v. 15-17; 1 Cor. 15:51-58; 2 Cor. 5:1-10)

iv. Pakai ama tah (midang hilou) vanna kon na hunga amitheng te ahung pui ding ahi (v. 16; Jn. 14:1-13; 1 Cor. 15:2-23, 51,58; Jn. 5:28,29).

v. Ahing nalaiho kikhel masanga Christa'a thiho thou masa ding ahi (v. 16; 1 Cor. 15:23, 51-58)

vi. Adam'a pat'a tu changeija chule houbungho chu mommang theija kon monmang theilouva kikhel dingu (hetman louva), athiho ahungthou dohho toh kiloija vanna Pakai to kimuto dinga leng tou dingu ahi (v. 17; Col. 3:14; 2 Thess. 3:7).

4. **RAPTURE UMLONA DING JEH 10 HO** (10 purpose of rapture) 4:1-17

i. Akitepna banga amite chu ama'a dinga akisan theina ding (4:7; Jn. 14:1-3; Eph. 5:27).

ii. Christa'a thiho jouse agilou'a thi ho'a kon achon ahiuva atho theina diu (vv. 14-17).

iii. Mithengho vangam'a Jerusalem thah'a achen theina dingu leh atoh gao akisan theina dingu (v. 17; 3:12; Jn. 14:1-3; 2 cor. 5:10; Heb. 12:22,23; Rev. 19:1,10; 21:9,10).

iv. Mithengho Pathen angsung alhun theina diu (v. 17; 3:13; Jn. 14:1-3; Jude. 2,4; Rev. 19:1-10).

v. Mithengho tahsa monmang theilouva akikhel na ding (v. 16, 17; I Cor. 15:38-58; Phil. 3:21).

vi. Mithengho tahsa, lungthim le lhagaova achamkim theina dingu (v.16,17; 3:5,13; Phil. 3:21).

- vii. Go masa leh go nukhah achan theina ding (Jacob. 5:7; Jn. 14:1-3).
- viii. Mithenghon thuphona kisei thoh hahsa khang apel doh theina diu (Rev. 6:11-19:21; I Thess. 4:16,17; 5:9; Lk. 21:36; Rev. 4:1).
- ix. Dan suhsetna thuguh lahmanga aum na ding (2 Thess. 2:7).
- x. Anti-Christ ahung kitahlang theina dinga phalna kipehna ding (2 Thess. 2:7; Rev. 4:1).

OUTLINE

1. Introduction (1:1)
2. Paul lunggel (1:2-3:13)
 - a. Houbung ho henga kipa thusei (1:2-10)
 - b. Houbung ho athah gel dohsah (2:1-16)
 - c. Houbung ho ding agel khoh (2:17-3:13)
3. Paul'in bol dinga thuhil 4:1-5:22
 - a. Then na lampang 4:1-8
 - b. Kitup tah'a hin 4:9-12
 - c. Thi le rapture thu 4:13-18
 - d. Thengsel la hin le Pakai nikho 5:1-11
 - e. Houbung kiloikhom/kiguijop 5:12-15
 - f. Christian hin kho manding dol 5:16-22
4. Conclusion 5:13-18

THESSALONICA MITE HENGA PAUL LEKHATHOT NINA

KOIJIN ITIH'A ATHOT HAM

Paul'in hiche lekhatot hi amasapa athot jou chomkhat jouva Corinth'a aumlai mama'a athot ahi (AD 51 jolam ahilouleh AD 52 bullam). Timothy toh Silas toh umkhom ahijeh'un (Acts. 18:5; cf. 1:1) Paul'in Thessalonica houbung aphudoh khompi ahilhon toh lhona athot khompi ahi.

LEKHA KITHOT LONA JEH

Paul'in 1st Thessalonian athot jouva houbung chu apilhin jepma akhantou jep (1:3) toh lhon chun asunga boina leh bolgentheina jong ahat/atam jep jepmin ahi. Pakai Jesu chungchanga muchi dihluu akitu'in houbung chu boinan ahin lon khom jinge. Hijeh'a chu Paul'in houbung sunga:

1. Bolgentheina jeh'a lunglhaho leh thohjouna ding ngaichaho lhamon nading (1:3-12);
2. Thuhil lhem, Pakai Jesu hung kitna ding chung changa alungu suboiho (amahon Christa chu ahungin ahoubung ho apuitou tan, tu'a hi eiho "Pakai Nikho'a um ihi taove" ti'a hilho) donbutna ding leh thuhil lhem in ajo'a kichatah'a um tahsan ho hildih/suhdih nading (2:1-15);
3. Pathen thupéh anit loujeh'u, adeh'a anatoh nom loujeh'uva phosal na leh hilchahna'a (3:6-15) athot ahi.

1st Thessalonica thupi chu “Christa ahunga atahsan te jouse athi ahia ahing nalai ho ahia ama’a dinga ahung puitou ding” ahin, 2nd Thessalonica thupi hi “Jesu Christa leisetna thutan dinga ahung’a michonse ho chungu anatoh dinga ahungtoh ding” ahi. Hetding chu hiche teni kah’a hi kum 7 sung thohhahsa khang (Dan. 9 na’a hapta 70 lah’a 1 vatnalai pa) chu umding ahi.

2nd THESSALONIAN THUHIL PHABEP

1. **PAKAI NIKHO:** Hiche hi 2:2 na’a kimu khu ahi. Hiche hi Old Testament khang laiija patna themgao hon anasei jingu, ahunglung dinga kitep ‘lenggam’ kisei na ahi. Hiche hin houbungho ahung lungdinga aumchan dingu leh Christa alenggam tungdoh dinga ahung ding ahop’e.

1st Thessalonica’a chun mithengho anathi ho chun Christa’a hingnalai amitheng ho puija ahung tengleh chan aneije tin aseijin; 2 Thessalonica’ah mitheng ahin nalaiho chun thoh gentheina phat (tribulation) sunga pan alah lou dingu ahi ati. Pakai nikho hin Pakai’in aleng gam atun doh ding nikho aseina ahi to lhona, chuleh michonse ho chungu thoh hahsa phat ahunglung ding to lhona thil ni’in ahin lhun khum masah ding ahi. Hichu: Dansuse chonse pa leh anti-Christ hung lung masa ding ahi. Chuleh Anti-Christ ahunglung masanga rapture um tei ding, chuleh anti-christ hung lungpan ding ahi(2:6,8).

2. ANTI-CHRIST CHUNG CHANGA THUTAH (2:3-12)

- a. Anti-Christ chu chonset bolpa/chonsepa akiti (v. 3, 8-12; Rev. 13:1-18; 14:9-13).
- b. Mangtah chapa akiti (vv. 3, 9-12; Rev. 13:2; Dan. 8:24).
- c. Pathen dou pa akiti (v. 4).
- d. Pathen banga houding adei ding ahi (v. 4).
- e. Ama chu mi ahin, Christa’in Armagaddon gal teng asumang ding ahi (v.8, Dan. 7:11; 8:28; Rev. 19:11-21; Isai. 11:4).
- f. Satan sottolle ahin, vanoi vaipo (dictator) khat tundoh ding asom ding ahi (v. 9; Dan. 8:24; 11:37,39; Rev. 3:20).
- g. Milhemlha leh mijousei thupi tah hiding ahi (vv.11,12).

3. JESU CHRISTA NIVEI NA’A AHUNG KIT DING PHAT (1:7)

- a. Thohgenthei na khang (tribulation) jou jou hiding (Mtt. 24:29; 25:31; Rev. 11-19:21).
- b. Kumsang lenggam kipat ding kon (Rev. 19:11-21; 21:1-10).
- c. Anti-Christ in kum thum le akeh avaihop nung leh (Rev. 13:5; 19:11-12; 2 Thess. 2:8-9).
- d. Rome lenggam sunga lenggam som ahung kiphudoh teng (Dan. 2:44-45; 7:23-24; Rev. 13:18).
- e. Lot leh Noah khang lai banga chonthan hoina sang tah ahung lhun teng (Mtt. 24:37-51; lk. 17:23-27; 2 Tim. 3:1-13; 4:1-4; 2 Pet.2).
- f. Houbung khang kichai jou leh (2 Thess. 2:7,8; Acts. 14:1-5; Zech.14:15).
- g. Chonpha thiho thodoh nung, chonsetna thiho thodoh kum 1000 masang (Rev. 20:1-5; Zech. 14:5; jude.14).
- h. Kum sang lenggam masang satan kihen tup jou (Rev. 20:1-7).

OUTLINE

1. Introduction (1:1,2)
2. Bolgenthei ja aumjeh'uva Paul'in alha monna (1:3-12)
3. Gaothusei ahet them lou jeh'uva Paul'in ahilchetna (2:1-17)
4. Paul'in houbung ding agelkhoh (3:1-15)
5. Paul thuchaina (3:16-18)

TIMOTHY HENGA PAUL LEKHATHOT KHATNA

INTRODUCTION

Timothy lekhathot teni hileh Titus hi Pastoral Epistle tin akihei. Asunga thu um hin hiche lama ding mong ahi ti aphochene. Hiche hi Paul'in apentah sah khangdong ni'a dinga athot ahi (ITim. 1:2; Tit.1:4). Amani hin Paul hi amissionary kholjin na'a ajui jing lhonin, hiche lekhathot thum athot hi Pastor'a apan sahlhon nunga athot ahi. Aman muthei houbung kivaihomna ding dol kichen tah'in adung jui tahin atah lange.

ASUTPHAT

Timothy lekhathot khatna hi Paul'in Roman songkul atan masah (Acts 28:17ff) ahung kilha doh jouva athot ahi (ca. AD 62-64)

TIMOTHY HINKHO

Timothy hi Lystra khomi ahin (Acts. 16:1-3) Paul'in akholjin masat'a Lystra'a na atoh lai ja pengtah hidinga tahsan ahi (Acts. 14:6-23). Ajeh chu Paul'in a-Missionary kholjin nivei na'a Lystra agaphah'in Timothy hi akiloipi dingin alheng doh'e (Acts. 16:1-3). Hiche phatna hi Timothy chu khangdong cha ahin (kum 20 vel), Paul'in kum 15 nungin jong khangdong ati nalaije (4:12). Amahin Pathen hetna lam'a dinmun sangtah aneije (Acts. 16:2). Timothy hi Paul seijui (disciple), aloi leh anatoh khompi ahi jingin, Berea'a ahin (Acts. 17:14), Athen (17:15), Corinth (18:5; 2 Cor. 1:19), Jerusalem'a ache in jong akilhon pin ahi (Acts. 20:4). Rome'a songkul atan masah in Paul toh aumin, Paul kilha doh nungin Philippi'a ache'e (2:19:23). Heb. 13:23 a kimu dungjuijin Timothy hi hoilai hamkhatna songkul atangin akilha doh'e akiti.

Paul hi Roman songkul atan masah'a kon akilha doh nungin (cf. Acts. 28:30) anatoh na masa khopi ho tamtah Ephesus jaonan aga nungvil kitnin, hikom (Ephesus)'a chun Timothy hi Houbung sunga boina ho: Thuhil lhem (1:3-7; 4:1-3; 6:3-5), Pathen houna kitup lou (disorder in worship: 2:1-15), lamkai bulhing (qualified leader) angaichat jeh'a (3:1-14); thil le lo, neile gou khoh sah ho (6:6-19) sulham dingin adalhah ahi. Chuin ama (Paul) Mecedonia lama ache pai pai jin, chukom muna kona chu Timothy dinga hiche lekhathot hi houbung sunga anatoh achelha'a, kituptah'a atoh theina dinga ahin thot ahi (cf. 3:14-15).

1st TIMOTHY KITHOT LONA JEH

Paul'in hiche lekhathot hi ipi dinga ajih khoh khoh ham ti hi Dr. Thiessen sei dung juijin:

1. Thuhil dihlo ho akidoupi nadinga tilkhouna (1:3-7; 18-20; 6:3-5,20,21).

2. Paul'in Timothy mopohna apeh agah suhdetna (1:3-5).
3. Mihem khat chu Houbung sunga iti dola chon ding ham ti'ahil na
4. Anatoh na'a lunglut tah le ching thei tah'a apan na dinga ahilna (4:6-6:2).

TIMOTHY KHATNA THUPI:

Timothy khatna thupi hi Local Houbung sunga kivaihomna leh houbung dan (church manual) ahi. Ephesus lekhatot achun Houbung hi Christa tibah ahi atin, hichun mutheilou houbung aseina ahin, hilaija Paul'in houbung ati hi muthei houbung tahsan chate kiloikhomna aseina ahi.

Thuhil/kihilna dih leh umchan dih hi houbung melchih na ahito lhonin, thuhil (doctrine) hi 8 vei akimun, Pathen het/ngaisah (godliness) 8 vei akimun, hil le mihil (teach & teacher) 7 vei akimun, apha (good) hi 22 vei akimun ahi.

1st TIMOTHY 3:2-7 DUNGJUIJA HOUBUNG LAMKAI DING QUALIFICATION

1. **Nolna bei:** Themmo gah chan na thei ding mun otlou, athemmo'e ti'a gah seinah ding mun leh chonna neilou.

2. **Numei khat ji'a nei:** Hiche hin ji 2/3 neija jikop atina goh hilouvin, thaikem neilou; aji toh kikhen kit nunga jong ji neikit lou atina jong ahi.

3. **Kitimthei:** Chingtheitah, kiging jinga um, lungthim kihong tah'a lunggel nei thei mi.

4. **Lunglimtah:** Kituptah mi, atohding kitup tah'a tongthei, lhagao thil lampanga mi kituptah (serious).

5. **Kituptah:** Chingthei tah, hinding banga hing – Kitimthei, lunglimtah, kituptah hohi ngolthe thu, lung phing tah'a lunggel, boina hinso thei; thil dihloou hinsodoh ho kidin tepi thei.

6. **Jindotthem:** Christian tampi akisuh manga akibol genthei lai tah'a ainsunga chu mijouse dinga'a kot honsa kojingho. Tulai jenga jong mihepithem, nolneilou mijouse a'insung mi'a simthei le ain'a dinga mi thet neilou.

7. **Mihil them:** Pathen thu he le hilchen thei, Christian thuhil ho hoitah'a hechen na mi dang jong peson thei

8. **Junelou:** Akikham mai mai hilouva hakham ma kikham, midang hinkho theng lama puithei ding ahijala ama tah chu ju donlou hel hiding.

9. **Mideng lou:** Itobang dinmun hijong leh lungneng tah leh lung ngaikham tah'a tahsa mangcha thei; lungsatna lama ama le ama kitimjou.

10. **Minunnem:** Mingaikham, thohhat, sottah genthei jou

11. **Douhol lou:** Mitoh kinalou, mi lunghan na ding seilou, gellou, bollou, kitomopi neilou, mijouse toh kicham dela um.

12. **Sum ngailulou:** Sun ngailuval la thildang jouse sanga chungnunga koi, Pathen thu jeng jong khohsah manlou leh lhagao mangthai dingle mission natohna jong saiman louva sum jeng khoh sah hilou ding.

13. **A'insung kitup tah'a potup thei:** Christian insung kitup tah'a semdoh thei chun midang jong ajo thei ahin, ama insung kisuh tup joulou chun midang insung le midang asemdoh ding chu thil hithei ahi behpoi.

14. **Tahsan thah hilou:** A pengthah til til hilou ding, Christian hinkho'a experience saothim tah hinnei mi hiding. Ajeh chu hitobangho chu ahung kiletsah nomun, chuleh Pathen thu hetna lama jong alhasamun, amaho chu munung jui hijo dingu ahi.

15. **Polam mite seiphat:** Houbung mi hilouva atahsan louho jengin jong aseiphat, apachat, aja'u hi ngai ahi.

OUTLINE

1. Lemna (1:1,2)
2. Thuhillhem chung changa thuhil na (1:3-20)
 - a. Ephesus'a thuhil lhem (1:3-11)
 - b. Paul thuhil dih (1:12-17)
 - c. Timothy tilkhouna (1:18-20)
3. Houbung chungchanga kihilna (2:1-3:16)
 - a. Taona thupidan (2:1-8)
 - b. Numei mopohna (2:9-15)
 - c. Houbung lamkai ding qualification (3:1-13)
 - d. Paul'in lekhatot athot lo na jeh (3:14-16)
4. Thuhil dihlou ho chung changa kihilna (4:1-16)
 - a. Thuhil dihlou ho kihilchet (4:1-5)
 - b. Thuhil dih kihilchet (4:6-16)
5. Pastor mopohna chung changa kihilna (5:1-6:2)
 - a. Achonse ho chung amopohna (5:1,2)
 - b. Meithai ho chung amopohna (5:3-15)
 - c. Upa ho (elders) chung amopohna (5:17-25)
 - d. Soh ho chung amopohna (6:1,2)
6. Pathen mite chung changa kihilna (6:3-21)
 - a. Thuhil dihlou ho tijat aumdan (6:3-5)
 - b. Sumngailut tijat aumdan (6:6-10)
 - c. Pathen mite umchan dihtah (6:11-16)
 - d. Gou hoitah'a chintup ding dan (6:17-19)
 - e. Thutah hoitah'a chintup ding dan (6:20-21)

TIMOTHY HENGA LEKHATHOT NINA

ASUTPHAT

Paul'in 2nd Timothy hi martyr achan ding kon Roman songkul anivei na'a aumlai ja ajih ahi (AD 66-67).

THUMAKAI

Roman songkula akihen khatvei na'a akilha doh nung, Nero (AD 54-68) 'in Christiante abolgenthei laijin Paul hi songkul avelin atang kitnin ahi. Anivei na'a akihen kitna hi amasa pa'a banga kilha doh kit ding kinem talou ahi (4:6-8). Nero'in Christiante abol genthei masang (AD 64), Paul songkul atan masat chun House Arrest mai mai ahin, midang kimutopi theina phat jong anei thei (Acts. 28:16-31) ahi. Ahin kum 5/6 nunga aumkit pa'a hin (AD 66-67) bul apu'in (2:9), kilhadoh kitna ding kinepna anei tapoi (4:6). Hijeh'a hi Paul'in Timothy akin nathei penna Rome khatvei ahung phah'a angaikhoh hole solchah ho toh hung dinga ahil ahi (4:9,21).

2nd TIMOTHY THUHIL

Paul'in akichaina ding anai lam tai ti ahen, Timothy chu solchah din mun tobanga natohna (non-apostolic mantle of ministry) chu apedoh'in (2:2), anatoh na'a kitah tah le dettah'a atoh dingin atil khouve (1:6). Thuhil dihchu atuh det dingin atilkhovin (1:13,14), Adihlou abolou din ahile (2:15-18). Gospel jeh'a genthei na chang dinga kigosa dema um dingin atil khovin (2:3,4; 3:10-12), Kipana thupha'a kingama hangsang tah'a thu ahil dingin atil khouve (3:15-4:5).

2nd Timothy chang chabi chu 2:13; 4:2 ahin, thucheng thupi chu "Jachat/jahcha (ashame) 1:8,12; toh "Thoh" (endure) 2:3 ahi.

2nd Timothy'a Paul'in kipana thupha kiphon jal jeh'a ahung sohdoh ding aseijin, hichu: kipana thupha kisei phong jeh'a achaina teng aga chu mijouse penthah sah ding jong hipontin; kumsang lenggama jong mijouse lhacha le'in pang louding; amavang thuhil lhem, mitamtah tahsan na'a kon apul lhahna ding (apostasy) joh hung lhung ding ahi ati. Hijeh'a chu Paul'in Timothy jah'a khonunga hunglung ding ahil chet masat ahi. Tahsan na'a kon lhahmang (apostasy) tihi Webster dictionary hilchet dungjujin, mihem khatin tahsana dihtah apailhah ding aseina ahi..

Hitobang nikhoho chu Jesu Christa leisetna ahung masah leh ahung kit ding kikah'a soh ding ahi. Chuni leh mihemho chu tahsan na dihtah pomtah sanga:

1. Ama changmai kingailu: lunggel, toh, ngaito na jouse'a "kei" ngen hiding.
2. Sumngailut: Pathen sanga sum nagailutna pungding.
3. Nomham: ahina, aboltheina kisonga nop ham.
4. Huset le hoitho: lunggel le natohna'a kiletsah.
5. Taitomhat: Pathen thu le lhagao thuho nahsah louva dem.
6. Nuthu pathu ngailou.
7. Phat ngaisah lou: lungset leh thilpha achan ho chungang jong kipahlou.
8. Lungset na neilou: sopi adeh'a ngailutna neilou.
9. Kihoupi cham pi mohel.

10. Hehset hat: mitaitom, mi ahilou lama hehse.
11. Ti kitimlou: Adeh'a jonthan hoi nalama.
12. Kichat um: Akhoh, mitha mimat ding jong khoh sa lou.
13. Phatna ho'a: Mipha thetbol, thilpha deilou.
14. Tahsan pailha.
15. Kichamsah.
16. Kiletsah.
17. Pathen ngailut sanga nopsah ngailu:
Hiche ho ahung guilhun teng Christa ahungna ding anailam tai ti melchih na ahi.

2nd Timothy lekha thot athot phat donna Paul'in atijat pi chu Timothy hi lhagao lama analhah sam khah ding hi ahi. Ajehchu Paul'in Timothy chu chutobang din muna anading dinga jong asonlel ahi. Timothy chu atoh ban tong dinga adeilhen ahi (2:2) jeng vanga ipi dinga Paul'in Timothy hi hibanga ason lel ham, ahilouleh ipi dinga Paul hi lunggima ham ti akimu poi.

2nd Tim sunga Paul'in Timothy atil khouna chu: Paul'in Pathen thilpeh Timothy'a um chu akon doh sah jing dingin ahilin (1:6); kichatna chu/kichatna lhagao chu thil bolthei thahat, ngailut le lungthim themna lhagaova akhel dingin ahile (1:7); Paul leh Pakai chu ajachat pi lou ding ahi'a kipana thu jalla hesoh hi athoh ding in atilkhouve (1:8); thutah chu atuh det jing dingin (1;13,14) ahilin ahi.

OUTLINE

1. Lemna leh kipa thusei (1:1-5)
2. Pathen mipa thoh hatna (1:6-18)
 - a. Tilkhouna (1:6-11)
 - b. Vetkahna (1:12-18)
3. Pathen mipa umchan dingdol (2:1-26)
 - a. Paul (2:1,2)
 - b. Sepai (2:3,4)
 - c. Kichem mi (2:5)
 - d. Loulhou mi (2:6,7)
 - e. Jesu (2:8-13)
 - f. Natong mi (2:14-19)
 - g. Bel (2:20-23)
 - h. Soh (2:24-26)
4. Pathen mipa tijat umpeh dan 3:1-17
 - a. Tahsan na pailhah na dinga thuhil (apostasy) kimaitopi (3:1-9)
 - b. Apostasy ajo (3:10-17)
5. Pathen mipa thusei (Preaching) - 4:1-5

- a. Thusei dinga thupeh (4:1,2)
- b. Thusei angaikhoh (4:3-5)

6. Thuchaina

TITUS HENGA PAUL LEKHATHOT

TITUS

Titus hi Paul toh Timothy toh anatong khom, Paul'in ana minphah jing, tahsan thudola kacha tahtah anatin ahi (1:4). Solchah lekhabu'a amin akiphah khahlou vangin Lekhathot ho'a akimin phah jinge. Amahi chepkitanlou, gentile, pendol la Greek mi ahi (Ga. 2:3). Paul'in amahi Jerusalem Council'a akipuijin, gentilete houbung (Christian) ahitheina dinguva angaicha ho thudol kinel na'a chun Paul'in Titus hi ana kipuije (Gal. 2:1ff; Acts. 15:1ff). Titus hi Paul toh aMissionary kholjin nivei nale thumvei na'a kilhon hidinga ginchat ahi. Paul'in Titus min aphah nukhah pen'a kimu dungjuijin Titus hi Dalmatia (tu'a Yugoslavia) 'a ache'e ti ahi (2 Tim. 4:20).

LEKHATHOT KITHOT PHAT

Hiche lekhatot hi Zenas leh Apollos'in agathah ahi (3:13). Hiche lekha thot hi Paul'in Roman songkul atan masat akilha doh jouva 1st Timothy toh AD 62-64 laija Meceadonia houbung hoa akimanchah lai, Corinth ham Nicopolis ham'a kon athot ahi (cf. 3:12). Paul'in Crete hi Rome'a achelai jin chomcha agavil pa'in (Acts. 27:7-9; 12,13,212) ahi. Chukom'a akile kitnin anatoh ban gatong dingin ahung potnin, Timothy Ephesus'a adallah bangin Titus jong Crete'ah ahin dalhan, ama Meceadonia'a ache'e.

AKITHOT LONA JEH

Hiche lekhatot hi Titus in Paul lekha athot ahilouleh Crete mite thupeh donbutna'a Paul'in athot ahi.

LEKHATHOT THUPIHO

1. CHRISTIAN THUSEI KHATNIN ATOHDING THIL THUM HO CHU (2:15):

- a. Seijin; hiche hin thu seiphong ding aumin seilou ding jong aume.
- b. Tilkhouvin, chuleh
- c. Koimacha kinah sah mo sah hih'in.

2. HOUBUNG SUNGA MIJAT CHOM CHOM HO HILNA:

- a. Pasal tehse (upaho) dinga hilna (2:1,2)
- b. Tehse numei (Nupiho) dinga hilna (2:3)
- c. Nupi khangdong/khangthah ho kihilna (2:4,5)
- d. Golhang ho kihilna (2:6-8]
- e. Sohho dinga kihilna (2:9,10)
- f. Achunga ho jouse jotheina (2:11-15)

g. Mijouse dinga kihilna (3:1-11)

3. TITUS SUNGA THUHIL PHABEP

- a. Pathen milhen/ Pathen'in thaneitah'a tahsan ho alhen (1:1,2).
- b. Amilungset mihuhhingna (2:11, 3:5).
- c. Christa Pathen ahina leh second coming (2:13).
- d. Christa lhatdoh na natoh (2:14).
- e. Lhagao then mipenthah sah na leh misil thengna (3:5).

OUTLINE

1. Liemna (1:1-4)
2. Evangelism natoh na dinga athupi/ngaikhoh (1:5-3:11)Lamkai ho lah'a (1:5-16)
 - a. Lamkai hetna / upa ho hetna (1:5-9)
 - b. Thuhil dih louho phona (1:11-16)
 - c. Houbung sunga 2:(1-15)
 - i. Hinkho theng (2:1-10)
 - ii. Thuhilna dih (sound doctrine) (2:11-15)
 - d. Leiset chungna (3:1-4)
 - i. Hinkho theng (3:11)
 - ii. Thuhil dih (3:5-11)
3. Conclusion (3:12-15).

PASTORAL EPISTLE SUNGA THUHIL LHEM TIJAT UM HO PHABEP

(Extra notes)

1. **Miching ho'a kona hungpot:** Hiche hohi Thudoh ahinso doh ji'e (1 Tim.1:4); kinkelalna thei thudoh ho apotsah'in (1Tim.6:4), ngolhoi tahtah thudoh adong ji'e (2Tim.2:23). Hitobang ho hi miching ho kichepna ahi.

2. **Kiletsah na jeh'a hungpot:** Hitobang thuhil lhem hin podoh ho chu imacha aheth lou vangin akilet sah ji'e (I Tim. 6:4)

3. Hitobang thuhil ho lah'a hin thil ni aume:

i. **Ascetism:** Nehding dan asemun, Pathen'in imajouse apha dinga sem ahi sumilin thil tamtah atheng louvin aseijuve (1 Tim. 4:4,5)

ii. **Immorality:** Hitobang thuhil lhemho chun insung jenga jong alutnun numei lhasam le angolho chu alhemlha'un ngaichat phalou aneisah jiuve (2Tim.3:6). Pathen chu kahei atiuvin ahin anatoh'a aphonng doh pouve (1 Tim,1:16). Amahon athuhil dihlohou hou amachalna dingin mi sum tampi pi apejiuve (I Tim.6:5).

4. Hitobang ho hi khanggui thusei, Pathen jaolouna thusei, pannabei kinkelalna ho'a kon ahi (1 Tim. 6:20) Hicheho chun tantih neilou khang gui thusim asutnun (1 Tim. 1:3), moh thusim aso dohji'e (1 Tim. 1:3; Tit.1:4)

5. Amaho chun Tahsa thokit na asang nom pouve (2 Tim. 2:18).

PHILIMON HENGA PAUL LEKHATHOT

PHILIMON

Philimon hi Colossia houbung mi (Col.4:9; cf. vv.1,2) ahin, a'inn chu kikhopna/houin kaina'a kimang (v.2) ahi. Hiche lekhatot hi ama le ainsung mite dinga kithot ahi. Hiche lekhatot hi Prison Epistle ho lah'a khat ahin, Colossia toh kinaicha Colossia lekhatot toh thakhatna kijih hidinga tahsan ahi (AD. 60-62).

LEKHATHOT KITHOT LONA:

Philimon hi Christian mihaosa tah khat ahin, asohpa Onesimus kitipan achoma anei agou ho aguh peh'a ajam mangpi ahi. Chuphat lai ja chu Onesimus pengthah loulai ahi. Onesimus'in apupa thil ahin guh'a asoh hina'a kona ahung jama Rome ahung lhuna chu Paul toh kisuto'a Paula'a kona pentahna ahin nei ahi (v.19).

Paul'in hiche soh jammang pa chu nasatah'in angailun (2,16) kikoi den ding anom l'eh jenge (13). Ajehchu Paul songkul tan na'a chu nasatah'a akitho pi'a pang ahi (11). Ahin gucha leh soh jammang chu dan (Roman dan) dungjuja ichan ato dingham chu ahen, Paul'in Onesimus chu Colossia'a ahin lesol kit ahi. Paul'in Onesimu achanga ache ding aboi dingjeh chu (Ajeh chu soh dinga mi man atam jeh'in) Tychicus, Colossia a hung kile kit dingpa, Colosse lekhatot ahin poh sah pa toh ahin solthan (Col. 4:7-9) ahi. Onesimus toh hiche lekhatot hi Philimon henga dinga asol la Onesimus chu ana ngaidam'a Christa'a sopi khat le natoh khompi dinga ana lem dinga angeh ahi (15-17).

LEKHATHOT THUPI

Hiche lekhatot kithot lona thupi pen chu Christan eilungset leh eingailut nao phondohna ahi. Aman Pathen henga eiho khela eithum peh'u ahi (v 18 cf. 2 Cor. 5:21a). Chuleh sopi le sopi kingailut ding dan kihilna jong ahi. Paul'in mundanga hin pu khat le soh khat akiguijop theina ding dan aseiji'in, hilai'a hin iti kipohdoh (demonstrate) thei dingham atah lange.

OUTLINE

1. Lemna (vv. 1-3)
2. Angaidam pa hina (character); (vv. 4-7)
3. Angaidam pa natoh (action); (vv. 8-18)
4. Angaidam pa lung tup (motive); (vv. 19-25)